



Wantok

Niuspepa Bilong Yumi Ol PNG Stret!

K1 tasol

Wantok Today

bilong dispela mun i stap insait...

P9,10,19,20

Namba 2137 Ogas 27 - Septemba 2, 2015 28 pes

INSAIT

**Bisop:
Senisim Haus
Tambaran - P2**



**Ol Manam
lida no
amamas long
Gavman - P3**



**Meri
sanguma
tanim bel -
P14**

Laipstail



Singsing long lewa stret...



NESENEL Ripentens na Kavanen De Ogas 26, 2015 i kamapim nupela samting insait long bikpela haus kalabus long Bomana. Dispela poto i soim sampela ol kalabus meri husat i senisim laip wantaim Jisas Kraus i singim wampela song long givim glori go long God na long givim bel isi long ol lain i stap long dispela de bilong ripentens.

Long namba wan taim bihain long PNG Gavman tokaut long dispela dei olsem em i de bilong tanim bel na tok sori long God, Koreksenel Sevis Dipatmen i holim de selebresen bilong tingim God na tok sori. Long dispela dei, CS Komisina Michael Waipo wantaim olgeta asisten na ekting asisten komisina bilong CS wantaim ol woda man na woda meri na olgeta kalabus man na meri na sampela famili na ol nius man na meri i bin holim bung insait long hap bilong bikpela kompaun long pre na tok sori long God na askim long blessing bilong en.

Poto: CS Midia Dairekta -Inspekta Richard Mandui

Ol sios i no wanbel

Aja Potabe i raitim

YUNITI long spirit na pasin bilong wok bung wantaim insait long ol sios long PNG i no stap moa.

Dispela pablik holide asde, Trinde Ogas 28 long makim nesanel de bilong beten na tanim bel i soim olsem sampela ol sios lida i no wanbel long ol samting i kamap long makim dispela de.

Sampela senia pasta na sios lida i sapatim Palamen Spika Theo Zurenuoc i laik kukim ol kaving na tumbuna samting we Spika i bin rausim long Palamen Haus sampela mun i go pinis.

Tasol sampela ol sios lida i no bin joinim ol dispela sios lida. Nem bilong grup bilong ol sios lida husat i sanap baksait long Zurenuoc em Bodi ov Kraus.

PNG Kaunsil ov Sios (PNGCC) i no wanbel long dispela bung long kukim ol kaving. PNGCC i makim maus bilong moa long 90 pesen bilong olgeta sios insait long PNG.

Siaman bilong PNGCC, Bisop Denny Guka husat i bisop bilong Angliken sios long Pot Mosbi, i tok ol senia pasta, sios lida na wokman bilong God i no ken miksim sios wok wantaim politiks.

"Yumi sios lida i mas stap wantaim na mekim wok bilong God. Yuniti em i bikpela samting. Yumi mas sanap wantaim na wok bung wantaim. Yumi no ken miksim politiks na sios wok wantaim," Bisop Guka i tok.

I go moa long pes 2...

"Friends"
"Kaibigan"
"Wantoks"

1975

Air Niugini
www.airniugini.com.pg

EXCLUSIVE CARRIER FOR THE 2015 PACIFIC GAMES

Facebook Twitter

PORT MORESBY 2015 XV PACIFIC GAMES

TODAY

Bisop: Senisim 'Haus Tambaran'

Aja Potabe i raitim

Angliken Bisop bilong Pot Mosbi, Denny Guka i salensim Spika Theo Zurenuoc long senisim 'Haus Tambaran' na sanapim nupela palamen haus gen.

Bisop Guka em i siaman bilong PNG Kaunsil ov Sios (PNGCC). PNGCC em i makim maus bilong moa long 90 pesen Kristen sios insait long PNG.

Em i bin mekim dispela toktok long Mosbi we PNGCC i autim tingting bilong ol long edvetismen i kamap long makim Ripentens De asde Trinde 26 Ogas.

"Rausim Palamen Haus na wokim nupela gen bikos em i no haus bilong man, em i haus bilong tambaran na spirit nogut," Bisop Guka i tok.

Sampela memba bilong

Palamen na ol sios lida husat i stap klostu long Spika i sapotim em long rausim ol kaving na ol arapela tumbuna samting i stap olsem bilas long Palamen haus. Ol i bilip ol spirit nogut insait long ol dispela kaving i save paulim tingting bilong ol memba.

Long mun Epril, Spika wantaim sampela sios lida na memba bilong Palamen i bin go long Amerika na kisim wanpela olupela kopi bilong King James Baibel i kam long kantri na ol i putim long Palamen haus long strongim ol lida.

Gren Sif Sir Michael Somare i tok Spika Zurenuoc i no ken paulim tingting bilong ol manmeri.

"Yu laik raitim gen nupela Buk Baibel o mekim wanem? Tok bilong God i kam insait long kantri em i stap pinis. Buk Baibel ol misineri i bin givim yumi i

stap yet. Mi salensim Zurenuoc long stopim dispela tingting bilong em," Sir Michael i tok.

Em i tok ol lida i no ken miksim politiks wantaim sios wok bikos taim tupela samting i save miiks, planti hevi na asua i save kamap.

Gren Sif i tok dispela ol kaving em i samting bilong tumbuna na kalsa bilong dispela kantri we God i givim long ol pipel.

"Papa God i givim mipela dispela kantri wantaim tu ol kain kain pasin tumbuna na kalsa bilong yumi. Yumi mas lukautim kalsa na tumbuna samting bilong yumi.

"Spirit nogut i no save stap long kain kain samting olsem kaving tasol. Buk Baibel i tok stret olsem spirit nogut i save stap insait long bel na tingting bilong man," Sir Michael i tok.

Somare: Ol yangpela i mas skul gut

Aja Potabe i raitim

OL yangpela manmeri i no ken smok mariwana na dring stim na hombru. Tasol ol i mas skul gut na kisim gutpela save long ranim dispela kantri long bihain taim.

Gren Sif Sir Michael Somare i autim tingting bilong em long ol yangpela manmeri bilong kantri tude.

"Bihain taim bilong dispela kantri i stap long han bilong ol yangpela manmeri. Mi laik ol yangpela manmeri i mas skul gut, kisim gutpela save na kamap ol saveman na meri bilong dispela kantri," Sir Michael i tok.

Sir Michael i tok em i laikim ol yangpela manmeri long kisim save na skulim gen ol narapela manmeri insait long komyuniti we ol i no save gut long wanem samting i wok long kamap long PNG na wol.

Sir Michael i tok PNG em i no olsem ol arapela kantri. Em i tok Papa God i blesim gut tru kantri bilong yumi.

"Kantri bilong yumi em i naispela tumas. I gat planti



Gren Sif Sir Michael Somare

sans i stap long PNG i mekim planti gutpela samting. Tasol edukesen em i bikipela samting. Ol yangpela i mas skul gut na yusim gut save long kirapim dispela kantri," Gren Sif i tok.

Em i tok bipo PNG i no bin gat planti saveman na meri tasol i bin kisim independens hariap tru.

"Maski yumi i no bin gat

planti saveman, mi bilip strong long God na kisim independens. Na tru tumas mi ken tokim yu olsem Papa God i helpim yumi na blesim yumi gut tru."

"Mi amamas stret olsem nau PNG i gat ol saintis, dokta, pailot, ensinia, loya, akaunten na planti arapela saveman tu."

"Mi laik PNG i kamapim ol roket saintis. Yes, yumi ken. No gat wanpela samting bai pasim. God em i stap wantaim yumi," Sir Michael i tok.

Las wik long Waigani Semina, Nesenel Plening Minista Charles Abel tu i bin tokaut long skulim planti manmeri long kamap ol saveman na meri.

Mista Abel i bin tok PNG i mas kirapim edukesen sekta long apim kwaliti na stended bilong edukesen na larim planti manmeri i kisim gutpela save.

Em it ok namba bilong nening skul na ol tisa kolis i mas gro. Wan wan provins i mas gat ol tisa kolis na skul ov nening.

Ol sios i no wanbel

I kam long pes 1...

Bisop Guka i bin stap wantaim Asbisop John Ribat bilong Pot Mosbi Katolik Daiosis, Presiden bilong Baptis Yunion Sios, Reveren Martin Wayne, na Gren Sif Sir Michael Somare long Katolik Bisops Konprens long Mosbi na mekim dispela toktok.

Gren Sif Sir Michael i tok as tru long em i bin sainim wanpela kavanen long larim PNG i luksave long God bilong Israel em long bringim pasin yuniti i kam insait long wok bilong olgeta sios insait long kantri.

Gren Sif i mekim dispela toktok long dispel wik Mande taim em i klaiam tok long as tru bilong PNG long

makim Ogas 26 olsem nesanel de bilong beten na tanim bel.

Sir Michael i tok em i laikim ol manmeri PNG long lusim pasin nogut na bihainim Tok bilong God.

"Mi bin sainim dispela kavanen long yia 2007 long Mosbi. Mi bin gat gutpela tingting long larim ol sios i wok bung wantaim aninit long pasin bilong wok bung.

"Kantri bilong yumi i pulap long hanmak long Papa God na mi laikim olgeta manmeri na olgeta sios long wok bung wantaim na stap olsem wanpela bodi long spirit bilong yuniti."

Gavman givim K260m rot kontrak long Saina kampani

Stanley Nondol i raitim

NESENEL gavman i givim moa long K265 milien rot kontrak i go long wanpela kampani bilong Saina long wokim 14 kilomita rot long Westen Hailans provins.

Seketeri bilong Woks David Werek i makim gavman na s a i n i m K265,787.887.70 kontrak wantaim China Harbour Engineering Compani long 14 kilomita na 4-pela len rot long Keltiga rot bung long Hagen distrik i go long Kagamuga ples balus.

Dispela rot projek bai pinis insait long tupela yia.

Minista bilong

Woks Francis Awesa i tok dispela kontrak em kam aninit long Ensinia Prokumen Kontrak na bai no gat veriesen o senis bilong prais.

Minista Awesa i tok dispela projek em stat bilong Hailans Haiwe Rehabilitesen Program na wok stretim long Hailans Haiwe bai go het long ol arapela provins.

Minista Awesa i tok gavman i yusim bikipela bilien kina long stretim ol rot na wokim planti projek long Lae na Mosbi siti na gavman i lukluk nau long stretim ol rot long ol arapela senta olsem Hagen, Kokopa na Goroka.

Minista Awesa i tok dispela K265 milien rot projek bilong



Seketeri bilong Woks David Werek i makim gavman na sainim K265,787.887.70 kontrak wantaim China Harbour Engineering Compani. Foto: Nicky Bernard

Keltiga na Kagamuga em bikipela mani tasol Hagen siti em senta bilong Hailans rijon na bisnis i wok long gro na em i moa gutpela gavman i stretim ol infrastraksa olsem rot.

Minista Awesa i tok klia olsem dispela projek i bungim mak bilong ensinia na i bihainim stretpela rot bilong givim kontrak

long bikipela milien kina.

Long wankain taim Mista Awesa i tok tenkyu long gavana bilong Westen Hailans long wok bung wantaim em na gavman long go pas long tokim ol pipel long no ken askim tumas long kompens-

esen long gavman long nem bilong divelopmen.

Minista Awesa i tok gavman i gat plen long wokim bikipela rot projek long kantri na singaut long ol lida long distrik, provins na ples long wok bung wantaim gavman na tokim ol pipel tu long ol i no ken pasim ol divelopmen.

K9

Dial *123*9# to subscribe

24 hrs validity

24 mins talk time

bmoblie | vodafone

International calls for less

Contact us now!
Customer Care 76003555
support@bmobile.com.pg

www.bmobile.com.pg

Maru tok klia long ol egrikalsa projek

Stanley Nondol i raitim

Minista bilong Tred, Komes na Indastri, Richard Maru i tokaut olsem Sepik Plein projek we planti ol egrikalsa projek bai kamap em wanpela bilong ol egrikalsa projek Nesenel gavman i kamapim long olgeta pipel bilong Papua Niugini i kisim sevis.



Minista bilong Tred, Komes na Indastri Richard Maru.

Ol sampela bikpela egrikalsa projek gavman i laik kamapim na fisibiliti stadi i wok long go het dispela taim em Makam Veli long Morobe provins, Karamui Veli, Baiyer long Westen Hailens, Trensogol long Madang, Sepik Plein long Is na Wes Sepik na Sentral Plein.

Minista Maru i tok tupela konsalten long Australia i wokim ol fisibiliti stadi nau long ol 6-pela eria long kantri long painim aut wanem ol egriklasa prodak bai kamap long graun. Ol bai tok save long nesenel gavman long painim ol divlopa long patna wantaim gavman long kirapim ol projek.

Minista Maru em memba bilong Yangoru Saussia long Is Sepik we Sepik Plein egrikalsa projek bai kamap. Em i tok olsem projek bai kamap long distrik na provins bilong em tasol em i no projek bilong Yangoru distrik o bilong is Sepik, em i bilong nesenel gavman na i bilong olgeta pipel bilong kantri.

Minista Maru i mekim dispela toktok bihain long wanpela divlopa bilong welpam long Malesia, Kuala Lumper Kepor (KLK) i sainim agrimen wantaim nesenel gavman long divloim Oil Pam projek long Sepik Plein long dispela wik.

Minista Maru i tok Papua Niugini i gat bikpela graun na ol neturel risos na i mas wok hat long eksptom planti ol egrikalsa prodak i go long wol maket na na mekim bikpela bilien kina winmani.

Em i tok Sepik i gat 500,000 hekta bilong graun long wokim ol egrikalsa projek. Na dispela i winim graun long kantri Israel wantaim 200,000 hekta na i wokim moa long K40 bilien winmani long wan wan yia.

Israel i soim laik pinis long wokim deiri na kakaruk fam long Sepik Plein na long Sentral provins. Minista Maru i tok PNG i gat graun na i ken wok bung wantaim Israel long yusi teknoloji bilong ol na i ken kamapim moa winmani bilong kantri.

Miinista Maru i mekim dispela toktok long rausim ol sampela tokwin i kam long papagraun long Is Sepik olsem em i wokim politiks bilong em long Sepik Plein projek.

Tasol Mista Maru i tok Sepik Plein em i projek bilong nesenel gavman na i givim K50 milien pinis na ol wok long ol infrastraksa olsem wara saplai, pawa saplai na rot i wok long go het long opim rot bilong divlopa bilong welpam i go insait .

SP Brewery i lonsim nupela Kundu bia

SP Brewery i kamapim wanpela nupela bia i gat 4.5 pesen alkool volium.

Nem bilong dispela bia em "Kundu Singautim Yu" long makim singaut i go long ol sitisen bilong PNG long no ken bagarapim laip na sindaun bilong ol wantaim ol kain kain bia i no gutpela. Na Kundu bia em bilong ol PNG long baim long prais we i no bikpela.

SP Brewery i tok em i kamapim nupela resipi wantaim bikpela Teknoloji bilong wol na prais bilong em i no dia tumas long ol kastoma.

Nem bilong dispela nupela bia em Kundu na SP Brewery i wokim dispela long ol kastoma i ken baim long liklik mani na drink gut na amamas.

Ol i bin tesitim dispela bia pinis na i kamap wantaim K72 prais long wan wan katen.

SP Brewery i tok kampani i makim Kundu dram bikos em wanpela sain bilong kantri na dispela Kundu bia ol i wokim long PNG yet long ol sitisen bilong kantri.



MOA LONG K48 MILIEN KONTRAK ROT SAINING: Gavana Jenerel na Gren Sif, Sir Michael Ogio i sainim kontrak long bildim 36 kilomita rot long Hela, Sauten Hailans, na Seketeri bilong Woks Dipatmen, David Wereh wantaim Moses Palipe, Menesing Dairekta bilong Ipwenz Construction Ltd em kampani i winim kontrak. Manimak bilong wok kontrak long dispela rot em i moa long K48 milien.

Poto: Gavana Jenerel Midia

A SMART SOLUTION FOR SMALL BUSINESS

Mobile & Internet Banking

Make supplier payments, transfer funds, pay workers and manage accounts anytime, anywhere.

EFTPoS

Safer, convenient solution for you and your customers. Reduces risk of cash handling and builds financial history.

Smart Business Debit Card

Make payments for goods and services and withdraw cash via the ATM and EFTPoS with your Smart Business Debit Card.

PLUS - Smart Business Loan

By having a Smart Business Package Account, you can have access to a Smart Business Loan.

BSP Smart Business Package

offers essential products that can help SMEs manage business funds and provides a pathway for growth.

NOW OPEN

BSP SME Business Centre
Waterfront Place Shopping Mall,
Port Moresby.



320 1212 / 7030 1212 - 24/7
servicebsp@bsp.com.pg
www.bsp.com.pg



Riviu bilong dispela wik...

Ol salim kaikai go pinis long Hailans

OL pipel long Simbu na Tambul long Westen Hailans bai gat ol saplai long kaikai i go pinis long Hailans.

Dispela ol ples i kisim bikpela bagarap long taim bikpela san i draim ol wara na ais i pun-daun na kilim ol gaden kaikai.

Nesanel Disasta Komiti Siaman, Dickson Guina, i tok ol i salim ol kaikai long Lae na bai go kamap long Hailans long Tunde.

Ol i salim rais, bisket na nudels i go long hap i kisim bagarap na sapos no gat wara long kukim rais bai ol i ken kaikai bisket.

Skul i pas bihain long tripela man dai - Hela

WANPELA Haiskul na ol praimer skul i pas bihain long pait i kamap namel long tupela ples we tripela man i dai na tupela i kisim bikpela bagarap long las wik Fraide long Tebi lokal level gavman long Tari.

Ol sumatin long Hoiebia Haiskul i stop long go skul bikos ol i pret long pait i kamap.

Tari Pori MP na Fainens Minista, James Marape i askim ol pipel long tokaut long wanem hap ol man i kilim tripela man i stap.

Em i laikim ol polis long mekim wok painim aut na lo bai mekim save long ol.

Sios i egensim Det Penalti

KATOLIK Asdaiosis bilong Pot Mosbi i givim strongpela toktok long ol pipel long kamap wantaim wanpela petisen long egensim det penalti taim palamen i sindaun long Okotba.

Sios i egensim det penalti bihain long ol kain kain nogut toktok i kamap taim Indonesia i kilim tupela lida bilong Bali Nine long dispela yia.

Asbisop bilong Pot Mosbi, John Ribat, i tok Katolik sios bai go het long egensim det penalti long PNG.

Em i tok dispela lo i egensim laip na PNG olsem Kristen kantri i mas rispekim human laip.

Waiko i no kamap long Waigani Seminar

MAN i go pas long traime senisim nem Papua Niugini i go long 'Paradais', Dokta John Waiko i no bin soim pes long tokaut long tingting bilong em.

Dispela tingting bilong em bin mekim planti pipel i raitim kain kain toktok long intanet olsem facebook long dispela.

Profesa Waiko i no bin go long las wik Fonde long presentim 2015 Waigani Semina ovaviu, long tupela hap: Westminster stail na presidensel stail - bilong demokrasi - long PNG 1975-2015.

Ol pikinini lainim Inglis long taim ol i liklik

OL sumatin i lainim Inglis long liklik taim i gat sans long bungim Gret Poin Averej (GPA) bilong ol yunivesiti long kantri.

Wanpela tisa bilong Ligestiks long Yunivesiti bilong Papua Niugini (UPNG) i tok aut long dispela long Waigani Semina.

Signe Dalsgaard i tok ol sumatin i lainim Inglis taim ol liklik yet i gat bikpela sans long mekim gut long skul na go long yunivesiti. Ol dispela sumatin i save lainim tok ples na Tok Pisin taim bai painim hat liklik long skul.

Ol Manam lida no amamas long gavman

OL lidaman bilong Manam Ailan long Bogia, Madang provins i no amamas long pasin nesanel gavman i mekim.

Ol i no amamas bikos Palamen i no bin pasim o tok oraitm Bil we i ken kamapim Manam Restoresen Atoriti (MRA).

Siaman bilong Manam Restoresen Atoriti, Peter Muriki i tok i bin gat tupela Bil i bin kamap we i mekim Gavman i kisim planti tingting sapos em i mas pasim MRA o nogat.

Wanpela bil we Memba bilong Bogia John Hickey i kamapim long 2010 i tok bihain long mauten i pairap na bagarap i kamap manmeri i ken go bek long Manam ailan.

Namba tu bil we Gavana Jim Kas nau i kamapim i tok manmeri i no ken go bek long ailan.

Mista Muriki i tok dispela tupela Bil i paulim tingting bilong gavman long tok orait long bil.

Em i tok maski kain ol bil i kamap ol manmeri i wok long bungim bikpela hevi.

Long las tupela wik maunten i pairap gen na bagarapim ol manmeri i stap long ailan.

Wanpela nes long haus sik long ailan i tok wanpela man i



Manam Setelmen long Asuramba, Bogia distrik.

dai bihain long em i pulim win nogut i kamaut long mauten paia. Na moa manmeri i pilim sik na stap.

Na long dispela hevi bilong san i no helpim ol manmeri i stap long ailan.

Wara na gaden kaikai bilong ol i drai tu na ol i sot long kaikai.

Madang Gavman Jim Kas i no amamas long Madang Provinsal Disasta Opis long wanem K100,000 gavman bilong em i givim na K50,000

mani Nesanel Disasta Opis i givim long helpim ol manmeri i no go gut long wok bilong em.

Em i laikim olgeta mani i mas go stret long helpim ol manmeri na i no ken paul long hap rot.

Long dispela as Muriki i tok Gavman i mas hariap long stretim tok long kamapim atoriti bipo long moa laip i lus na bagarap i kamap.

Em i tok planti manmeri long ailan i tok ol i amamas long sindaun long bik ples long Bogia.

Na wanpela ples long Ramu wara long Bogia distrik i givim tok orait pinis long ol Manam i ken i go na stap long hap graun bilong ol.

Nau yet ol Manam i stap long ol kea senta long Postdam, Bom, Daigul na Asuramba.

Dispela ol kea senta i bilong ol Manam manmeri i stap hap taim tasol.

Long taim dispela lo bilong Atoriti i kamap, bai i tokaut stret long wanem hap ol bai go stap oltaim long em.

Gutpela Toilet bilong Lihir

Tony Sapan i raitim

OL Pipel bilong Lihir i save bungim hevi long no gat gutpela toilet o liklik haus nau i ken kisim helpim long ol Ventilesen Impruvmen Pit Toilet.

Dispela em ol 15-pela pit toilet ol ol i wokim pinis insait long Liebil komyuniti long Wes kos bilong Lihir Ailan.

Dispela i namba wan projek bilong Petztorme Womens

Asosiesen ol i laik bai helpim ol pipel long ailan wantaim gutpela klinpela toilet i no smel, na i kamapim gut helt na sindaun bilong ol.

Ol i wokim pinis 15-pela VIP toilet long Lienbil komyuniti aninit long lukaut bilong Lihir Ailan Komyuniti Helt Progrem.

Anna Hobo bilong Petztorme Womens Asosiesen i tok dispela projek i kamap bihainim 5-pela yia i stap long tingting, stat

yet long taim asosiesen i mekim namba wan singaut long helpim mani.

Dispela em long kamapim gut trot ol pipel i rausim pipia insait long ol komyuniti long ailan long inapim nid o laik bilong ol pipel long longpela taim.

Asosiesen i bin sainim wanpela tok orait wantaim Minerel Risos Atoriti na Wol Benk long Oktoba 1,2014.

Wanpela yia i go pinis na em

opim rot long wokim ol dispela VIP toilet long ailan i kostim K40,000 long

Taim i toktok long wanpela toktok gris long redio, misis Hobo i tok ol i ting ol komyuniti em ol i luksave long helpim ol i ken kisim long helt bilong ol i kam long VIP toilet, i ken askim long helpim i kam long lokel level gavman bilong ol na kampani i ronim Lihir Gol Main long wokim ol kain toilet olsem, insait ol ples na komyuniti bilong ol.



LONG LAE...Ol manmeri

Hela husat i save stap long Mosbi i bin go long Lae, Morobe bipo las wik long lonsim nupela non-gavman-ogenisesen (NGO) ol i kolim Lae Laif Impruvmen. Klostu long 700 manmeri i bin stap long Mosbi na go long witnessim dispela lonsin long Sir Ignatius Kilage Stadium long Lae. Bos meri bilong Lae Laif Impruvmen, Nelissa Utunu i bin amamas nogut tru long olgeta manmeri husat i bin kam long olgeta hap bilong dispela kantri long sapotim dispela nupela NGO husat i stap redi long wokbung wantaim gavman long senisim laip bilong ol manmeri Lae na Morobe Provins. Foto: Media Hillside Ltd



PIH Saveman Nius

"I kam long Pacific International Hospital Port Moresby"

Ph: 311 3000 and 799 88000 Textline 7155 8866 Website: www.pih.com.pg

SCREENING FOR BREAST CANCER

The 51st Medical Symposium will soon be held in Port Moresby, with a focus on women's health. It is organized for this year by the Women Doctor's Association. Definitely among the topics that will be brought up throughout the symposium next week will be about breast cancer.

According to Dr. Pius Umo, radiologist at the Pacific International Hospital, "breast cancer is among the leading cause of morbidity and mortality in our women."

Given such concern, the Pacific International Hospital is only one of two centres in PNG that has the mammogram machine. It is a vital tool in screening for breast cancer.

In a study done from 2006 to 2009, of 1,151 women screened for breast cancer at the Pacific International Hospital, roughly 4.35% of those screened turned-out positive for breast cancer. Of that total, sadly, 65% of those found to be positive were age 35 years and above. The results of this study also paved the way for the recommendation that the baseline age for women in PNG to have themselves screened for breast cancer should be at age 35 years.

Mammography is the process of using low-energy X-rays (usually around 25-28kVp) to examine the human breast, which is used as a diagnostic and screening tool. The goal of **mammography** is the early detection of breast cancer, typically through detection of characteristic masses and/or microcalcifications

A mammogram is an x-ray picture of the breast. It can be used to check for breast cancer in women who have no signs or symptoms of the disease. It can also be used if you have a lump or other sign of breast cancer.

Screening mammography is the type of mammogram that checks you when you have no symptoms. It can help reduce the number of deaths from breast cancer among women ages 40 to 70. But it can also have drawbacks. Mammograms can sometimes find something that looks abnormal but isn't cancer. This leads to further testing and can cause you anxiety. Sometimes mammograms can miss cancer when it is there. A source states, "It also exposes you to radiation."

When you have a mammogram, you stand in front of an x-ray machine. The person who takes the x-rays places your breast between two plates. The plates press your breast and make it flat. This may be uncomfortable, but it helps get a clear picture.

Your breast is briefly compressed or



squeezed between 2 plates attached to the mammogram machine—an adjustable plastic plate (on top) and a fixed x-ray plate (on the bottom). The bottom plate holds the x-ray film or the digital detector that records the image. The technologist compresses your breast to keep it from moving, and to make the layer of breast tissue thinner. A thinner layer of breast tissue allows the x-ray exposure to be reduced and makes the picture sharper. Although the compression can feel uncomfortable and even painful for some women, it is needed to get a good picture and only lasts the few seconds needed to take the x-ray. Talk to the technologist if you have pain. She can reposition you to make the pressure as comfortable as possible.

Generally, two x-ray views are obtained of each breast. More views may be obtained if the breasts are large, the woman has had a breast augmentation, or there is an area on the initial mammography views that needs to be further examined. Special magnified or localized mammograms of a specific area of the breast can then be done.

A radiology technologist is responsible for performing mammography. Once the x-ray pictures are taken, they are developed and examined by a radiologist (a doctor who specializes in the interpretation of x-rays and other imaging studies). In most mammography centers, these radiologists have also had extra training dedicated to interpreting. The procedure produces a black and white image that is read by a radiologist (a doctor trained to interpret images from x-rays, ultrasound, magnetic resonance imaging, and related tests.)

When mammography was first developed, the image was recorded on film. More often

now, the image is recorded on a computer instead. This is called a digital mammogram (also known as a *full-field digital mammogram* or FFDM). Digital mammograms may be better than film mammograms at finding cancers in women younger than 50 and in women with dense breast tissue. In the United States, most mammograms are digital.

Many sources consulted mentioned about the risks of being exposed to radiation while undergoing a mammogram, but, new findings seems to dispute such, like: *July 15, 2015 (HealthDay News) — The low risks from radiation exposure during*

mammography screening may be even lower than experts have assumed, a new study contends.

The new research estimates that the radiation dose from a screening mammogram is anywhere from 20 percent to 35 percent lower than previously thought.

Why? Because past estimates did not account for the uneven distribution of different types of tissue in a typical woman's breasts.

Past estimates have assumed that fat and glandular tissue are distributed uniformly throughout the breast, Hernandez said. But, recent research has shown that the different tissue types are actually more "mixed" than that, he said.

For their study, Hernandez and his team created a model of breast anatomy based on CT scans from 219 women — who ranged in age, ethnicity and breast density.

This new findings should allay fears in the past that there is a radiation risk. There may

be such, but, according to Dr. Pius Umo of the Pacific International Hospital, "it is all really a matter of risk-benefit analysis... there might be a risk, but should choose the need to find out if one has breast cancer or not... the actual benefit of finding out the diagnosis

outweighs the potential risk that maybe one might suffer from the potential effects of low dose radiation. I agree with the new findings, because there are really many breast tissue types, and these have a big bearing on the distribution of glandular tissues throughout the breasts, and it is these glandular structures which are sensitive to the effects of radiation during the mammography."

The American Cancer Society recommends yearly mammography screening beginning at age 40 for women at average risk.

Dr. Pius Umo of the Pacific International Hospital says "with what we have seen of the incidence of breast cancer here in PNG, it is recommended that screening be considered earlier, say, by the age of 35 years old."

Other preparations for Mammogram. A brief medical history and a history of specific problems related to the breast, such as pain or a palpable lump (one that is felt), is obtained prior to the mammogram. A small x-ray marker may be taped on the breast overlying the palpable lump. This will help in determining whether any other special mammogram views need to be done beyond the standard views. All jewelry and clothing in the chest and breast area are removed prior to the mammogram.

Antiperspirants, deodorants, and powders should not be worn during mammography and should be removed prior to the procedure, as these substances may make interpretation of the results more difficult. Antiperspirants can cause the images to appear foggy, and powders can sometimes simulate the appearance of microcalcifications (an abnormal finding that is sometimes associated with breast cancer).

To end with a very unusual fact: though rare, there have been cases actually of men succumbing to breast cancer!

Any further queries about mammography may be directed to radiology@pihpng.com or send texts to 7155-8866.

FREE SURGERIES FOR CLEFT LIP KIDS

FREE SURGERIES FOR CLEFT LIP AND CLEFT PALATE WILL BE HELD IN OCTOBER AT THE PACIFIC INTERNATIONAL HOSPITAL COURTESY OF OPERATION OF HOPE DOCTORS FROM THE U.S.A. IF YOU HAVE A RELATIVE WITH CLEFT LIP, PLEASE SEND PATIENT DETAILS EITHER BY FACEBOOK, LIKING FB PAGE "PIHkinini Smile", OR EMAIL joel_marketing@pihpng.com OR TEXT TO 7155-8866.

2015 sponsors: Bougainville Copper Ltd, Brian Bell, Airlines PNG

Be part of the top-tier facility of your profession!!



Nurses, Midwives, and CHW welcome to apply

send your CV to supriya_hr@pihpng.com or text 7155 8866



Pasin pamuk i ken kilim turis bisnis

Tony Sapan i raitim

PASIN pamuk i ken bagarapim gutpela turis bisnis insait long Is Nu Briten Provins sapos ol i no lukautim na larim long winim ol narapela gutpela samting ol turis i laikim ol lodge, ges haus na hotel sampela pipel i lukluk raun

long provins i tok.

Dispela em tingting bilong wanpela lain wokman bilong gavman bilong maining ailan bilong Lihir em ol i no bin inap long slip long nait long wanpela gest haus long bihain long ol pamuk meri na ol pren bilong ol i pati long dringim strongpela dring na pilaim strongpela

musik long wanpela nait olgeta na ol i no tingim ol narapela ges.

Long dispela gest haus ol i saplaim ol sekyuriti gad wantaim strongpela dring na meri long grisim ol long no ken mekim samting long dispela pasin pamuk.

Ol ovasis papa bilong dispela hap i yusim taim bilong ol long

painim ol meri long mekim bisnis bilong dispela hap ol rum bilong ol i deti na ol i pulap long kain kain binatang wantaim ol kokoros.

Ol dispela wokman bilong gavman i singaut long Is Nu Briten Turis Atoriti na Asosiesen bilong ol papa bilong ol lodge, gest haus na hotel long pulim ol papa bilong ol kain ples olsem em ol i strongim ol

pamuk meri long mekim bisnis bilong ol insait long ol hap bilong ol long mekim samting bihainim lo.

Ol i singaut long ol long tingting gut long dispela na tok ol pamuk meri i no wanpela lain tasol i save yusim ol hap olsem long strongim bisnis long kisim ol gest olsem ol wokman bilong gavman em bai ol i laikim gutpela hap bilong slip.

Ol Papa graun bai kisim helpim

Sape Metta i raitim

OL Papa na mama graun long 59 asosiesen long 6-pela provins em Ramu na Brahman long Madang, Simbu, Jiwaka, Westen Hailans, Is Sepik na Isten Hailans bai i ken kisim wan handet pesen (100%) ik-witi benefit long ol sea bilong ol bihain long ol i kirapim na lonsim maining kampani bilong ol long Goroka, Isten Hailans long mun i go pinis.

Na lokal maining eksploresen kampani Giopa Holding Ltd i kisim luksave bilong nesenel na provinsal gavman husat i givim ful sapot na blessing long em long mekim wok maining insait long boda mak bilong Isten Hailans, Simbu, Jiwaka, Madang, Westen Hailans na Is Sepik. Maining dairekta Kondago Wau i tok em I no isi long kirapim maining kampani.

Em i tok em wantaim ol dairekta, sapota na papa na mama graun i bin bungim planti hevi long las 6 yia long

kirapim ol asosiesen na kampani.

“Taim mipela i save raun i go na paitim dua bilong ol bisnismen na meri, kampani na ol gavman enjensi, tok tok mipela save kisim em, KON LAIN, giaman lain,” Wau i tok.

Em i tok dispela tok, i no stopim ol na bihain long 6-pela krismas, laik na driman bilong ol i kamap na karim kaikai nau.

“Nau mipela i ken wokim na ranim maining bisnis bilong mipela we klostu long faiv tausen (5,000) lokal man na meri bilong 6-pela provins bai kisim wan handet pesen benefit long en,” Wau i tok.

Fainensia o man husat i save i go pas long sapotim kampani wantaim mani, Obert Pupune i tok em i amamas long sapotim kain lokal kampani husat bai i ken wok na bringim benefit i go long intres bilong ol liklik lokal lain long ples.

Em i tok amamas olsem nesenel Minista bilong Maining

Byron Chan na Gavana bilong Isten Hailans i luksave na sapotim wok bilong Giopa Holdings Ltd.

Mista Pupune i tok kaikai bilong planti hatwok em i kamap na kampani i no kisim luksave tasol, em i kisim eksploresen laisens tu em minista Chan i givim long kampani i ken i go het long operet.

“Long kisim dispela kain laisens em i no isi, tasol sapos Mista Chan i ken bilip na givim laisens long mipela i ken operet, mipela bai i ken pruvim long em olsem mipela i ken mekim wok long wanem, mipela i gat olgeta masin bilong mekim wok bilong maining,” Mista Pupune i tok.

Em i tok tenkyu long Mista Chan long givim K20,000 i go long helpim wok bilong kampani.

Long wankain taim tu, Gavana Julie Soso i bin mekim tok promis long givim K200,000 long sapotim kampani long mekim wok bilong maining na eksploresen.



Minista bilong Maining Byron Chan na Gavana bilong Isten Hailans, Julie Soso i givim eksploresen laisens i go long ol dairekta na opisa bilong Giopa Holding Limited long Goroka, Isten Hailans long mun i go pinis.. Poto na Stori: Sape Metta

Nesenel Famas Sevings na Lons i pas

Tony Sapan i raitim

BIKPELA Sevings na Loan Sosaeti long kantri, Nesenel Famas Sevings na Lons Sosaiti i pasim wok bilong en long las wik, samting olsem tripela yia bihain long ol i stat long bungim hevi bilong mani.

Sosaiti em het opis bilong em i stap long Kokopo, bai pasim opis, bilong em taim 8-pela opis bilong em long Kokopo, Kimbe, Bialla, Kavieng, Namatanai, Madang, Buka na Wewak i pas pinis inap long sampela taim.

Wanpela hevi i helpim long pasim wok bilong sosaiti em i givim dinau long ol memba em ol i no bekim na bikos em i no inap long kisim bek ol dispela dinau, dispela i helpim pasim wok bilong en.

Long 17 ol wokman na meri bilong sosaiti long het opis bilong en long Kokopo, 6-pela tasol long ol bai ol i wok yet taim narapela 9-pela bai ol i pinis na i no gat pe.

Polye singaut long gavman daunim GST

Stanley Nondol i raitim

OPOSISEN Lida Don Polye i tok ol memba bilong oposisen bai blokim ripot bilong Takis Riviu Komiti long taim palamen I bung gen long mun Novemba. Na em i singaut long Takis Riviu Komiti long lukluk gen long Guds na Sevis takis na daunim bikos ol liklik manmeri long kantri bai kisim taim.

Mista Polye i mekim dispela singaut bihain long Siamen bilong Takis Riviu Komiti Sir Nagora Bogan i tokaut olsem takis bilong Guds na Sevis long kantri i go anap long 15 pesen, pastaim stap long 10 pesen.

Sir Nagora i tokaut bihain long Takis Riviu Komiti i pinisim wok bilong glasim ol takis long kantri. Dispela Komiti i tok long inkam takis i kam daun long K10,000 i go long K15,000. Sapos wanpela man o meri i kisim K15,000 long pe long wanpela yia bai no inap baim takis. Pastaim mak i bin stap long K10,000. Na i daunim ol takis bilong ol kopret



Oposisen lida Don Polye.

kampani.

Oposisen lida long FM 100 tok bek long dispela wik i tok oposisen i no gat inap namba tasol ol bai blokim long palamen na em i singaut long wan wan memba bilong palamen long skelim sapos go antap bilong GST bai helpim ol pipel bilong kantri o nogat.

Mista Polye i tok Takis Riviu Komiti i mekim asua long apim GST long 10 pesen i go long 15 pesen.

Em i tok sapos GST I go

antap, bai lukim prais bilong kaikai na ol samting long stua na ol arapela sevis we pablik save yusim bai i go antap tu.

Mista Polye i autim wari olsem bikipela milien populesen bilong kantri i no gat wok na taim prais bilong samting i go antap bai mekim moa hat long ol i baim.

Mista Polye i tok takis bilong ol bikipela kampani kam daun na takis we ol liklik manmeri save baim kaikai na sevis i go antap em i no stret. Dispela i soim olsem gavman i laik kisim long ol liklik manmeri na givim long ol bikipela kampani.

Papua Niugini i gat takis beis long 200,000 na i save mekim moa mani long takis long kamapim baset bilong kantri long wan wan yia.

Tasol Mista Polye i tok em i wok bilong gavman long olgeta taim i no ken givim hevi long ol pipel. Dispela nupela takis bai mekim hat long ol pipel i sevim mani bikos prais bilong olgeta samting bai go antap.

PNG lukluk long strongim bisnis wantaim India

PRAIM Minista Peter O'Neill wantaim sampela bisnis manmeri long kantri India i bung long wanpela bung bilong India Pasifik Ailan Kopresen (FIPIC) Lida Samit long dispela wik.

Tim bilong Praim Minista O'Neill bai lukluk long painim sampela rot long kamapim moa bisnis, strongim bisnis pren na rot bilong kamapim bisnis invesmen namel long PNG na India.

Praim Minista O'Neill i tok PNG i holim strong polisi bilong pren long olgeta na no ken mekim birua long wanpela long ol intenesenel wok dispela bung long India em long em wanpela eria long toktok long bisnis na apim tred na invesmen.

Mista O'Neill i tok PNG i lukluk long toktok long save na teknologi long reniuebel eneji we India i gat

bikipela eksperiens we ol kantri olsem PNG i ken kisim helpim.

Mista O'Neill i tok PNG na India em tupela gutpela pren long ol planti impoten eria na bai toktok long strongim ol wok namel long tupela kantri.

Long wan wan yia India i save mekim bisnis wantaim ol Pasifik kantri long samting olsem US\$ 300 na moa long US\$150 em long ol bisnis wantaim PNG.

Praim Minista O'Neill i tok long dispela bung PNG strongim bisnis pren wantaim India long kamapim moa wok namel long tupela kantri long eria bilong eneji, risos na fiseris.

Em i tok India i gat gutpela na nupela teknologi long givim edukesen na helt sevis.

Bihain long baileterel miting, Mista O'Neill wantaim tim bai go long lidasip samit long Fraide 21 Ogas.

Edukesen Ekt Riviu i go het

Tok lukaut long stil pasin long eksem

EKTING Seketeri bilong Edukesen, Dokta Uke Kombra i laik toksave long ol stekholda olsem ol wok long riviu bilong Edukesen Ekt 1983 we i stat las yia i go yet.

Dispela riviu i bin kamap bihain long toktok bilong Minista bilong Edukesen, Nick Kuman long Nesenel Edukesen Bot long karim aut riviu.

Dispela riviu i go wankain wantaim wok bilong lejisletiv rifom long stat bilong O'Neill-Dion gavman. Ol nid na laik bilong ol pipel na ol narapela lejislesen i kamapim dispela Edukesen Ekt long mekim wok i ran gut na karim aut sevis.

Dokta Kombra i tok Dipatmen bilong

Edukesen i amamas long sapot bilong Yuropean Yunion, Human Risos Dvelopmen Program 1 (HRDP1) ol i givim long Edukesen Ekt Riviu Teknikel Woking Tim (EARTWT) taim ol i go pas long riviu.

Em i tok moa olsem Edukesen Ekt Riviu Teknikel Woking Tim i kamap taim olgeta risonel stekholda konsaltesen i kamap las yia na ol polisi isu pepa i stat.

Ol i kisim ol tingting bilong Ministri bilong Edukesen na wanpela ripot bilong riviu ol i bin prisenim long senia edukesen opisa konprens long Lae, na Julai Nesenel Edukesen Bot miting.

Ol stekholda miting bai pinis long dispela mun na bihain, ol Teknikel Woking Tim bai wokim wanpela ripot long ol tingting ol i bungim long ol woksop.

Bai ol i raitim wanpela ripot wantaim ol stekholda na Dipatmen bilong Edukesen bipo long ol i givim long wanpela ligel drafman long wok wantaim Teknikel Woking Tim.

Long mekim amenmen bilong 2015 bai stat hariap na ol bai go het long wok bipo em i go long palamen.

Ekting Seketeri i askim pablik long givim ol moa tingting o askim long dispela email e d r e e s : Act_Review@education.gov.pg, o raitim pas long ol o ringim ol.

EKTING Seketeri bilong Edukesen Dokta Uke Kombra i tok dipatmen i save olsem i gat ol sekyuriti isu long printing na salim ol eksem o tes pepa i go aut, tasol em i tokim ol sumatin, tisa na skul edministresen olsem dipatmen i mekim olgeta samting long luksave olsem eksem bai wankain long olgeta sumatin.

Dokta Kombra i mekim dispela toktok bihain long ol ripot i

kamap long ol niuspepa olsem ol kwesten o long Gret 12 Riten Ekspresen eksem i go aut bipo long eksem i kamap long Mande Ogas 10.

"Mipela i no save olsem ol kwesten i go aut long ol sumatin long intanet bipo long ol sindaun long eksem o no gat. Tasol, mi laik toksave long olgeta pipel olsem dipatmen bai mekim wok painim na givim bikipela mekim save long ol sumatin o skul husat i spai long

taim bilong nesenel eksem," Dokta Kombra i tok.

"Sapos wanpela Gret 10 o 12 sumatin i spai o lukim long ol buk na mekim eksem, olgeta gret 10 na 12 sumatin long dispela skul bai kisim hevi," Dokta Kombra i tok.

"Bai yu bagarapim laip bilong yu sapos ol i painim yu spai. Mi laikim yupela olgeta long stadi gut na bai yupela redi long sindaun long ol eksem," Dokta Kombra i tok.

Em i askim ol papa mama na ol waslain long putim was long o pikinini na luksave olsem ol i go long skul na givim taim long ol stadi bilong ol. Em i tok husat sumatin i no givim taim bilong em long stadi i bai tingting long spai.

Dokta Kombra i askim ol sumatin, ol papamama na ol memba bilong pablik long ripot long dipatmen o polis sapos ol i lukim o harim olsem wanpela i salim ol eksem pepa na ensa pepa long strit.

JICA i sapotim edukesen long mets na saiens

Esther Bralyn Wani i raitim

DIPATMEN bilong Edukesen wantaim Japan Intanesenel Kopresen Ejensi (JICA) i wok bung long sapotim edukesen long Papua Niugini (PNG) long ol Mets na Sains teks buk.

Long dispela, Seketeri bilong Edukesen, Dokta Uke Kombra na Sinia Edvaise bilong Edukesen long JICA, Atsushi Matachi i sainim ol minit pepa long Pot Mosbi long redim saining bai kamap long Oktoba o Novemba long dispela yia.

"Mipela i amamas long sapotim developmen bilong PNG long 10-pela yia pinis insait long EQTV program na long dispela ekspirien, mipela bai sapotim Karikulum na teks buk insait long dispela projek long bikipela sekta," Mista Matachi i tok.

Long wankain taim, Dokta Kombra i tok PNG i gat longpela rilesensip o wok pren wantaim ol pipel bilong Japan na gavman long Japan stat long 1975. JICA i bin makim gavman bilong Japan na sapotim edukesen sekta long planti eria bilong kisim edukesen sevis i go aut na developmen. Long dispela bai mipela go het long amamas long ol dispela sans ol pipel na



Edukesen Seketeri, Dokta Uke Kombra i sainim ol minit pepa wantaim Sinia Edvaise bilong Edukesen long JICA, Atsushi Matachi na Sif Representetiv bilong JICA, Shigeru Sugiyama i lukluk (rait han) na Deputi Seketeri bilong Edukesen, Dokta Eliakim T Apelis (lep han) i lukluk.

gavman bilong Japan i givim Autkam Bes Edukesen. mipela nating na no gat pe.

"Mipela i tok tenkyu na nau mipela i go het long Stended Bes Karikulum we gavman i askim long 2011 na ripot i kam aut long 2013 we mipela i bihainim. Mipela i lusim

Mipela i stat wantaim elementri long 2014 na bihain bai mipela go het long praimer i na bihain sekenderi. Mipela i hop olsem bai em pinis gut long 2019," Dokta Kombra i tok.

Dokta Kombra i tok long nupela karikulum ol i mas gat ol silabas, tisa gaid na ol i mas ol teks buk bilong ol sumatin na ol narapela risos bai go wantaim ol buk.

Em i tok dispela ol bikipela samting ol tisa na sumatin i mas gat

long karim aut gut dispela karikulum.

Em i tok moa olsem nau long dispela projek JICA i sapotim ol long ol teks buk bilong ol i praimer i sumatin we bai banisim ol gut long skul.

"Yumi save olsem Japan i gat gutpela save long Sains na Mets long dispela dipatmen i askim gavman bilong Japan na JICA long helpim long dispela tupela sabjek. Mipela i hop olsem JICA bai sapotim mipela long developmen bilong Sains na Metemetiks teks buk bilong ol sumatin," Dokta Uke i tok.

Em i tok dispela developmen bai go het long 2016 inap 2019. Long wankain taim, Deputi Seketeri bilong Edukesen, Dokta Eliakim Apelis, i tok olsem dispela em long luksave olsem ol risos yumi gat long PNG bilong ol sumatin i stap long intanesenel stended.

"Ol sumatin taim ol i lukim ol teks buk, ol i ken mekim wankain samting olsem ol narapela sumatin long wol i mekim, long mekim ol samting olsem Australia na Japan i lainim. Em i no long teks buk tasol, em long kamap wankain olsem ol narapela intanesenel na long dispela taim bai yumi ken stap long level bilong ol.

TIPNG i amamas long Nu Erima Prameri

NU Erima Prameri skul long Nesenel Kapitol Distrik i go pas long mekim gutpela samting. Pastaim ol krismas go pinis, i bin gat planti pasin korapsen long skul tasol nau ol komyuniti memba i go pas long kamapim long ples klia.

Komyuniti wantaim wanpela man i tok aut i tok no gat long ol korap pasin i laik lukim jastis i kamap. Wanpela memba bilong skul bot i tok strong long lukim olgeta ripot bilong K261 480 mani we i bin raus long skul akaun.

Trensperensi Intanesenel PNG (TIPNG) i tok sapos i gat wari long ol yusim i ol krangi mani, em i bikipela samting olsem ol komyuniti i mas go pas long stopim na dispela em ol i mekim. Ol i tok ol diteil bilong rausim mani long ol skul akaun i mas stap bilong olgeta papamama, tisa na komyuniti long save.

TIPNG i tok ol skul atoriti i mas givim aut ol ripot na noken pret, na bihain konsitusen rait bilong ol pipel long kisim fri pablik infomesen.

TIPNG i amamas long Nu Erima Prameri skul komyuniti long askim long rait bilong ol. Mipela i laikim ol atoriti long harim dispela diman na tok aut long ol dispela mani.

Dispela bekim long wanpela skul bot memba i soim wanpela piksa bilong ol komyuniti i mekim wanem ol i mas mekim long luksave olsem ol i ripot long ol pablik mani.

Nu Erima Prameri i go pas long dispela piksa na bai go het long save long olgeta diteil bilong mani.

Bisnis skul long UPNG i senisim nem

BISNIS skul bilong Yunivesiti ov Papua Niugini (UPNG) i senisim nem bilong en long soim ol nupela senis long pablik polisi olsem hap bilong bikipela tingting long trenim ol yangpela PNG lida.

Nupela nem em, Skul ov Bisnis na Pablik Polisi bai strong wantaim moa akedemik woklain na nupela fekalti bilding aninit long patnasip namel long gavman bilong PNG na Australia.

Pastaim nem bilong skul i bin Skul ov Bisnis Edministresen. Dispela nupela nem bilong skul i kamapim nupela Pasifik Lidasip na Gavanens Prisint,

wanpela tingting bilong tupela kantri long kamapim gutpela ol lida husat bai kamapim gut ol sevis long PNG.

Pastaim nem bilong skul i bin Skul ov Bisnis Edministresen.

Em bai gat moa tisa na helpim long akedemik sait long Crawford Skul ov Pablik Polisi long Australia Nesenel Yunivesiti.

Em bai go kamapim ol greduet long ikononik na akaunting, pablik polisi, menesmen na ol narapela ol bisnis program. I gat plen long kamapim wanpela masta program long Pablik Polisi. Eksekutiv Din bilong skul,

Profesa Lekshmi N.Pillai, i tok senisim nem em i wanpela bikipela samting long soim nupela tingting long skul.

"Namba wan hap bilong dispela agrimen em long mekim gut pablik sevis na wok bilong karim sevis i go aut," Profesa Pillai i tok.

Yunivesiti Senet na Yunivesiti Kaunsel i bin tok orait long dispela nem senis. Long wankain taim, Hai Komis Minista Kaunsel bilong Australia, Rod Hilton i tok Australia i bin amamas long sapotim gavman bilong PNG long strongim lo bilong nesenel, provinsel na distrik level.

Gavman na pipel mas wok bung long taim bilong El Nini: PM

OPIS bilong Praim Minista Peter O'Neill i kisim ol ripot bilong taim bilong san o El Nino na i statim wok pinis long helpim ol pipel i kisim taim long ol hailans na nambis provins long dispela taim nogut.

Opis bilong Praim Minista i tokaut olsem em i stat long helpim ol pipel husat i kisim bagarap na i singaut long ol bisinis haus, ol gavman ejensi, ol lida bilong provins na ol pipel long wok bung long helpim ol lain i kisim bagarap.

Praim Minista O'Neill i tok dispela taim bilong ples i drai bai i bikpela tru na winim wankain hevi i bin kamap long 1997 na 1998.

Em i tok ol pipel na ol ejensi i mas wok bung long lukautim ol yet long dispela taim.

Mista O'Neill i tok namba wan wok bilong gavman em long lukluk long helt na sefti bilong ol pipel.

Em i tok gavman i kamapim wanpela program na rilif saplai i wok long go long ol eria kisim bagarap long dispela taim nogut. Long nau yet, ol 1,842,000 pipel i kisim taim bihain long bikpela san i bagarap ol gaden

kaikai na wara i sot. Na 1,303,000 i kisim bikpela taim stret, bikos ol i bungim ketegeri 4 draut.

Ol eria stap long hai altitud long ol 5-pela hailans provins na hap bilong Garaina na Waria long Morobe provins na Goilala long Sentral provins tu i bungim wankain hevi bilong bikpela san na gaden kaikai i drai na wara i sot.

Praim Minista i tok gavman i wok long salim saplai bilong kaikai na tu i givim helt sevis long ol pipel long eria nau kisim taim.

Mista O'Neill i tok ol provinsal gavman, Lokal Level gavman na ol pipel yet i mas wok bung long helpim ol komyuniti.

Nesenel Disasta Senta na Difens Fos i wok long go pas long rilif na imenjensi saplai wanataim helpim i kam long nesene gavman.

Em i singaut long provinsal disasta senta long mekim gutpela wok long painim aut long ol eria kisim bagarap long gavman i ken isi long helpim.

Em i tok, Nesenel Disasta Senta i mas wok bung wantaim ol gavman ejensi long sevim laip bilong ol pipel i no ken lus long dispela hevi.

APDET BILONG OL ERIA KISIM BAGARAP - Apdet em long 23 August 2015

| No | Name of Province | District | Type of disaster | category | No | Name of Province | District | Type of disaster | Category |
|----|------------------|----------------------|------------------|----------|----|------------------|----------------------|---------------------|----------|
| 1 | Enga | Kandep | Frost | 4 | 9 | Simbu | Kundiava/Ge | Drought & Frost | 4 |
| 2 | Enga | Surink | Frost | 4 | 10 | Simbu | Sinasina& Chuave | Drought & Bush Fire | 4 |
| 3 | SHP | Pangia | Frost | 4 | 11 | Simbu | Kerowhagi | Drought & frost | 4 |
| 4 | SHP | Ialibu | Frost | 4 | 12 | Simbu | Gumine & salt Nomane | Drought & Bush fire | 4 |
| 5 | SHP | Imbongu | Frost | 4 | 13 | EHP | Ungai Bena | Drought | 4 |
| 6 | SHP | Karinz & upper Mendi | Frost & drought | 4 | 14 | EHP | Henganofi | Drought | 4 |
| 7 | WHP | Tambul Neb liyer | Frost | 4 | 15 | ENBP | Rabaul & Kokopo | Drought | 4 |
| 8 | Morobe | Menyanya, Waria, | Frost | 4 | 16 | Central | Goilala | Frost | 4 |

Gavman givim K8 milen

NESENEL gavman i givim K8 milen long ol manmeri husat i bin kisim bagarap long taim tait wara na strong-pela win i bagarapim ples. Dispela mani i kam long 2015 Nesenel Baset.

Praim Minista Peter O'Neill i givim tok lukaut long ol mameri long no ken go aut long ol eria we wara i tait na strong-pela win i kamap.

Dairekta bilong Nesenel Disasta na Imejensi Senta, Martin Mose i tok K2 milen bilong dispela mani bai go long Sinivit long Pomio, Is Nu Briten, na Huon Galp long Morobe provins.

Bai K1milien i go long Westen Hailans na Kairuku Hiri distrik. Jiwaka provins bai kisim K300, 000 na K500, 000 bai go long ol liklik ailan long Bogenvil bikos ol i pipel long hap i wok long kisim taim i stap long klaimet senis birua.

Mista Mose i tok gavman i givim K2 milen long Sinivit komyuniti na Huon Galp distrik bihain long gavman i sot long K4 milen em inap long givim las yia.

Em i tok em i no save sapos sampela provins tu i kisim bagarap o nogat bikos ripot i no kam insait long opis bilong em yet.

Long mun Janueri, moa long 45, 000 manmeri i kisim taim long taim wara i tait long Galp provins. Long Sauten Hailans, 34, 000 manmeri i bin kisim taim long taim bikpela ren na haiwara i bin bagarapim Imbonggu, Ialibu, Pangia, Nipa, na Kutubu.

Hela i wetim yet LNG mani

Aja Potabe i raitim

GREN Sif Sir Michael Somare i tok ol papagraun bilong PNG LNG Projek i mas kisim royalti na ikwiti mani bilong ol.

Sir Michael husat i bin stap praim minista na long taim bilong kamapim dispela LNG projek i tok gavman i mas givim luksave long ol papagraun long Hela na stretim

hariap dispela mani bilong ol.

"Mi amamas tru long PNG LNG Projek. Dispela bikpela ges projek i kamap long kantri bilong yumi taim mi bin stap praim minista.

"Mi laik tok tenkyu long Exxon-Mobil long bilip strong long dispela kantri olsem wanpela gutpela kantri long inves na mekim bisnis.

"Mi laik tok tenkyu long ol lida bilong Hela na Sauten Hailans

long sapatim gavman long kirapim dispela bikpela ges projek.

"Wok bilong gavman nau em long stretim hariap ol papagraun long Hela na larim ol i kisim benefit long dispela ges projek.

"Mi no wanbel long gavman i no stretim ol papagraun hariap. Gavman i mas givim mani bilong ol papagraun long Hela," Sir Michael i tok.

Gren Sif i tok em i amamas tu

long ol arapela biknem kampani olsem Total SA bilong Frens i kam insait pinis long kantri.

Total bai kamap patna wantaim InterOil long kirapim namba tu LNG projek long Galp provins. Nem bilong dispela projek em i Papua LNG Projek.

Gavman i tok mani bilong papagraun i stap seif long wanpela tras akaun wantaim Sentral Benk (Benk ov PNG).



Piksa bilong tait wara i bin bagarapim ol ples long Madang sampela taim i go pinis. Foto: James Kila

U.S Embasi i sapotim Famili na Seksuel Vailens

1-TOK Kaunselin Helpim Lain Famili na Seksuel Vailens Nesenel Hotlain i op long Pot Mosbi long Trinde, Ogas 19 long dispela yia.

Dispela 1-Tok Kaunselin Helpim Lain fri sevis namba em 7150 8000.

Dispela hotlain bai kamap hap bilong kisim infomesen na sapot bilong ol man, meri na pikinini husat i lukim seksuel na jenda bes vailens o pasin bilong bagarapim meri

long Papua Niugini.

1-Tok Kaunseling Helpim Lain em i wanpela tingting bilong Child Fund PNG i wok bung wantaim Famili na Seksuel Vailens Eksen Komiti (FSVAC) bilong Konsaltiv Implementesen na Kaunsel, FHI360 wantaim helpim bilong gavman bilong Yunaitet Stets, Australia na Nu Silan.

U.S Embeseda long PNG, Walter E. North i tok gavman bilong U.S i amamas long

kamapim dispela hotlain.

"Mipela i amamas long gutpela wok bilong gavman na ol NGO patna long wok na stopim vailens egensim ol meri, ol pikinini na ol lain olsem. I gat planti wok long mekim tasol dispela hotlain em wanpela gutpela rot," Embeseda North i tok.

Dispela hotlain bai wok long 8-pela awa long wanpela de, na bai go long 12-pela awa long wanpela de stat

long mun Oktoba.

Husat i ring bai save long ol hait tok bilong ol kaunseling, ol riferel i go long ol lokal haus save givim sevis olsem seif haus, famili sapot senta, polis na ol ligel sevis.

ChildFund i wok wantaim Yunivesiti bilong Papua Niugini (UPNG) long wanpela kaunseling long luksave long trenim ol kaunsela long karim aut dispela wok inap bihain taim.

U.S i givim strongpela tambu long ol vailens kamap long soseri

YUNAITET Stets (U.S) i toktok strong long ol vailens o pait pasin i bin kamap long Mendi long las wiken.

Ol i givim sem long tripela meri na wanpela man long pablik, paitim na kukim ol wantaim ol hot ain bihain long ol i sutim tok long ol i wokim sanguma pasin insait long viles long Kave na Kumin Sauten Hailans provins we ol i mas mekim save long ol.

"Mipela i laikim provinsel polis atoriti long mekim wok painim aut na mekim save long husat i mekim dispela samting na putim ol rait risos

long long stopim kain pasin. Planti ol i no save ripotim ol kain vailens na husat i mekim ol i no save mekim wanpela samting long em.

Gutpela bekim bilong ol polis na jastis sistem bai stopim ol bihain kraim pasin na holim husat i mekim," U.S i tok.

U.S i toktok long strongim kriminel jastis sistem bilong Papua Niugini long stopim na strongim ol kriminel lo.

Ol i laikim gavman bilong Papua Niugini, pablik, na sivil sosaiti long tok no gat long vailens long ol komyuniti na stopim ol kain pasin.



U.S Embeseda long PNG, Walter E. North.

Meri seif bas i selebretim wanpela yia

Esther Bralyn Wani i raitim

GINIGOADA Bisnis Developmen Faundesen na UN Wimen i opim nupela patnasip long mekim wok i go bikpela long Pot Mosbi olsem seif siti i no gat vailens egensim ol meri na long wankain taim i selebretim wok bilong Meri Seif Bas.

Dispela Meri Seif Bas i bin stat las yia long ran namel long taun na Gerehu long Pot Mosbi. Ginigoada i statim dispela sevis na olsem 400 meri i save yusim dispela sevis olgeta de. Pot Mosbi Semba bilong Komes, CPL Grup, PriceWaterhouseCooper na Digicel i bin sapotim dispela wok.

Deputi Representativ bilong UN Wimen long PNG, Rebecca Lineham i tok, "Long 2014 UN Wimen wokim wanpela stadi long ol pablik transpot long Pot Mosbi na painim aut olsem 90 pesen bilong ol meri i save bungim sampela kain vailens taim ol laik kalap long ol pablik transpot olsem bas, wet long bas stop, wokabout i go long bas stop na long ol teksu.

Em i tok bihain long dispela stadi, UN Wimen i kamapim



Ol woklain bilong Ginigoada i sanap arere long Meri Seif Bas. Nicky Bernard

Seif Pablik Transpot Program.

Mis Lineham i tok wanpela bikpela hap bilong dispela program em long wok wantaim Ginigoada long sapotim bas sevis bilong ol meri na pikinini 'Meri Seif Bas'.

Tasol, em i tok Meri Seif Bas i no inap wok em yet long kamapim seif pablik transpot long Pot Mosbi.

Em i tok UN bai gohet long

wok wantaim nesanel gavman na NCDC long mekim gut ol pablik transpot long Pot Mosbi.

UN Wimen bai gohet long lukluk long kes-les tiketing rot, mekim wok long stretim ol bas stop antap long ol wok painim aut bilong sefti odit bilong ol meri.

Ol bai wok wantaim ol PMV draiva long stopim vailens

egensim ol meri long bas na ol pablik transpot na opim wanpela kempen long siti long promotim pasin bilong rispek namel long man na meri long bas, maket na strit.

"Yumi olgeta i laik lukim Pot Mosbi kamap wanpela seif siti bilong olgeta na wanpela siti i sapotim ol hatwok bilong ol meri na man wankain tasol," Mis Lineham i tok.

Ol meri gat bikpela sans long maket

OL meri fama i amamas long gavman i mekim dispela disisen long stopim impot bilong ol gaden kaikai long Papua Niugini.

Minista bilong Egrikalsa Tommy Tomscoll i tokaut long dispela tambu long Lae las wik.

Presiden bilong Wimen insait long Egrikalsa (PNG-WiA), Maria Linibi, i tok dispela tambu em gutpela nius long ol meri long planim ol fres kaikai bilong lokal maket.

Em i tok dispela em gutpela samting bai helpim planti ol meri i save wok gaden aninit long PNGWiA husat i save planim kaikai long gaden na lukautim.

Tasol, em i tok nau em i no rait taim bikos long san i draim olgeta graun na kaikai. Em i tok long dispela bai ol i no inap long saplain ol kaikai long kain taim olsem.

Mis Linibi i tok moa olsem ol PNG meri i save groim kaikai tasol planti bilong ol i save stap long ples na no gat planti infrastraksa o ol sapot sevis long karim ol kaikai bilong ol go aut long salim.

Em i wok wantaim ol NGO long skulim ol meri long distrik level na givim trening na skelim ol infomesen wantaim ol.

Buk bilong Pikinini selebretim Harim Awenes Wik

Long Papua Niugini i no gat planti disebel pikinini inap long kisim edukesen na wanem kain sapot ol i nidim. Nau yet long PNG em no gat man i save hamas pikinini insait long PNG i stap wantaim yau i pas o i no save harim gut toktok.

Buk bilong Pikinini bai selebretim Harim Awenes Wik wantaim tingting bilong rausim pasin bilong luk daun long ol yau pas lain, na givim sans long edukesen, long kamapim gutpela kwaliti bilong laip bilong ol lain i no save harim gut toktok.

Buk bilong Pikinini i kisim sapot i kam long Ausenco Faundesen long kisim tupela tisa bilong laibreri na long wok bilong laibreri. Ausenco Faundesen na Kramer Ausenco i helpim Buk bilong Pikinini long kamapim wanpela speselis literesi program bilong ol pikinini husat inap long harim gut toktok na i no inap long lainim gut samting o i no inap long lukluk na rit gut. Ol i helpim wantaim ol samting olsem ol iPad.

Wanpela bilong ol dispela pikinini husat i no save harim gut em Noah Agino, nau em i kamap Het Laibrieri bilong Buk bilong Pikinini. Noah i bin stap 4-pela krismas tasol na em i bin kisim wanpela eksiden we i bagarapim yau bilong em na em i no inap moa long harim toktok. Tasol dispela i no stopim em long painim gutpela laip na long helpim ol narapela pikinini long kisim gutpela laip bilong bihain tu.

Maski PNG i no gat plant helpim bilong ol lain husat i yau pas o ai pas o i gat sampela bagarap long bodi, Noah em i winim dispela kain tingting bilong 'mi no inap' na em i kisim skul inap long nau em i ken lukautim laibreri bilong Buk bilong Pikinini long Red Cros Spesel Edukesen Risos Senta.

Long wik bihain bai Wantok i ranim moa stori bilong Noah Agino.

Tari Sekenderi Skul kisim nupela haus tisa

Tari Sekenderi Skul Prinsipal, Clive Yemeni i kisim ki bilong wanpela dabol klasrum na wanpela haus tisa long han bilong ExxonMobil PNG (EMPNG), operetta bilong PNG LNG Projek.

Mista Yemeni makim maus bilong skul bod ov menesmen, edministresen, ol tisa na ol sumatin na em i tok tenkyu long EMPNG long taim EMPNG i givim ki bilong ol haus na klasrum i go long em.

EMPNG Hides Gas na Kondiseing Plent Senia Fil Suprintenden, Ken Rhyason husat i bin stap long makim EMPNG long givim ki, i tok, putim mani go long edukesen em i namba wan samting ExxonMobil PNG i laik mekim long komyuniti.

"Mipela i luksave olsem edukesen em i kona ston bilong Papua Niugini gat gutpela sindaun long bihain taim.

"Ol dispela gutpela developmen em bilong helpim ol pikinini long gat rot long kisim gutpela edukesen na em bai helpim ol long luksave long wanem kain save ol i gat na bihain bai em i strongim ol komyuniti bilong ol," Mista Rhyason i tok.



WELKAMIM KRITISISEM

Wanpela de, papa na pikinini man bilong em i go long ples bilong katim gras (*barbershop*). Bipo ol i go insait long barbershop, Papa i tokim pikinini bilong em: "Sapos yu laik bai ol i katim gras bilong het bilong yu i kamap naispela, no ken pret long makim man bilong katim gras (barber) i gat stail long gras bilong em. Bikos, em i no kaikai (*result*) bilong wok bilong em yet. I gat narapela man i bin katim gras bilong em.

Em i tru. Maski em i wanpela saveman tru bilong katim gras, tasol em yet i no inap long katim gras bilong em yet long sis. Wankain tu long wanpela dokta, em inap long operetim narapela manmeri tasol em i no inap operetim em yet. Maski i gat wanpela dentis i no bin traim long winim rekot long putim filing/karamap long tit bilong em yet, tasol risal bilong em i no gutpela olsem em i mekim long tit bilong peisen bilong em.

Dispela totok bilong mi antap i soim olsem, maski yu wanpela saveman tru long olgeta samting, tasol long laip bilong yu, bai yu mas nidim narapela manmeri yet.

Wanpela man, nem bilong em Ralph Waldo Emerson i bin raitim; "Ai bilong yumi inap long lukim olgeta samting, tasol em i no inap long lukim em yet."

Yumi nidim narapela manmeri long tok save o korektim rong bilong yumi. Yumi nidim tok stia bilong papa mama, yumi nidim edvais na koreksen bilong pren bilong yumi. Yumi nidim kritik na edvais bilong bos bilong yumi, yumi nidim edvais na tok stia bilong man o meri bilong yumi. Em i tru. Yumi nidim kritik na koreksen bilong narapela manmeri.

Eksperians long laip bilong yumi, sapos sampela man i korektim yumi o tokim yumi olsem pasin bilong yumi o samting yumi wokim i no stret, planti taim bai yumi i no pilim amamas. Na planti taim yumi tok nogat long koreksen o kritissem bilong ol na traim long difendim yumi yet.

Em i tru. Yumi save amamas tru sapos narapela manmeri i preisim wok o toktok o pasin bilong yumi. Sapos ol i givim gutpela toktok long yumi, bel hevi i no save kamap long bel bilong yumi.

Yumi mas tingim olsem, manmeri i save akseptim na kisim koreksen na tok orait long kritik bilong narapela manmeri, em yet i helpim em yet long abrusim pasin nogut bai kamap bihain.

Sori long manmeri i save tingim olsem aidia, tingting na pasin bilong ol i stretpela tasol. Dispela kain manmeri i no gat taim long stretim laip bilong ol yet na ol i no inap kisim narapela samting i mobeta long tingting na pasin bilong ol yet long dispela taim.

Olsem na yumi mas amamas oltaim long ol manmeri i save kritisasim yumi na givim tok stia long laip bilong yumi. Yumi mas luksave long dispela manmeri i olsem gutpela pren bilong yumi, na ol i no birua bilong yumi.

Tasol yumi mas lukaut gut long ol manmeri i save preisim yumi na mekim gutpela toktok tasol long yumi. Bikos ol i no inap lukim samting rong insait long yumi. Bikos sampela taim dispela manmeri i preisim yumi long maus bilong ol tasol, i no kamap long bel na tingting bilong ol yet.

Olsem na redi olgeta taim long welkamim kritissem bilong narapela manmeri. Bikos, kritissem bilong ol i helpim yumi long stretim pasin nogut bilong yumi na strongim yumi long mekim kamap samting i moa beta long wanem samting yumi i gat tude.

Manmeri i save akseptim kritissem bilong narapela manmeri, i save amamas oltaim long laip bilong ol.

Giaman ol Kristen pulap long PNG

Aja Potabe i raitim

OL GIAMAN Kristen i pulap long kantri bilong yumi, wanpela gavman minista i tok.

Nesenel Plening Minista Charles Abel i tok PNG i pulap long ol giaman Kristen bikos planti manmeri i save toktok long gutpela samting na ekting Kristen tasol ol i no save mekim samting stret.

"Long maus, yumi i wok long toktok long stopim pasin korapsen tasol eksen bilong yumi i no go stret."

"Long maus, yumi tok PNG em i Kristen kantri tasol pasin na eksen bilong yumi i no

olsem Kristen.

"Ol man i wok long kilim ol yet go kam long Hailans. Pasin korapsen i wok long i go antap yet.

"Olsem wanem nau? Yumi nidim planti Buk Baibel na sios o?"

"I luk olsem yumi save bihainim mani na i no God," Minista Abel i tok.

Mista Abel i bin mekim dispela toktok long Waigani Semina las wik taim planti pipel na ol bikman bilong sios na gavman i redi long selebretim 40 yia independens anivesari long neks mun.

Palamen Spika Theo Zuren-

uoc i laik mekim Palamen Haus i kamap 'klinpela haus' we no gat wanpela spirit nogut bai stap long paulim tingting bilong ol nesanel lida.

Mista Zurenuoc i bin go kisim pinis wanpela kopi bilong olpela King James Buk Baibel long Amerika na bai putim dispela Baibel long Palamen Haus.

Em i mekim olsem long soim olsem PNG i wanpela strongpela Kristen kantri. Tasol pasin bilong ol lida na ol manmeri i no stret tumas.

Long dispela wik Asbisop bilong Katolik Sios long Pot Mosbi, John Ribat i tok ol lida i

mas daunim ol yet long ai bilong God.

"Ol lida mas bihainim toktok bilong Baibel. Ol i no ken larim dispela Buk Baibel i stap nating olsem wanpela samting nating long Palamen Haus," Asbisop Ribat i tok.

Em i tok ol sios lida long PNG i amamas long ol lida i wok long luksave long God. Tasol em i tok ol i no ken toktok long maus tasol olsem PNG em i Kristen kantri.

"Ol lida i mas soim gutpela pasin na kala na larim ol pipel i bihainim gutpela pasin bilong ol," em i tok.

Salens long KJV Baibel toktok

OL politikel na sios lida i no ken paul na mekim ol stetmen long Palamen long ol samting ol i no klia gut long en.

Presiden bilong Katolik Profesenel Sosaiti long PNG, Paul Harricknen i mekim dispela toktok bihain long wanpela toktok William Powi, Gavana bilong Sauten Hailans i bin mekim long Julai 30, 2015 long Palamen i kisim KJV i go long Haus Palamen.

Mista Harricknen i tok stetmen i paul no stret bikos em i tok stetmen i abrus long toktok long KJV i go long Baibel stret, na em i no mekim tok klia namel long tupela.

"Samting i no stretem, stetmen o toktok ol i mekim long Baibel yet i aplai o i toktok tu long KJV, na dispela i no tru.

"Stetmen i no mekim samting klia em ol i mas minim yet long mekim olsem na dispela i no hones long putim kain stetmen olsem," Mista Harricknen i tok.

Em i tok long wanpela hap bilong stetmen, em i tok ol slev long Amerika i bin yusim KJV olsem fridom tioloji.

"Tru, sampela slev i ken yusim KJV na ol narapela buk Baibel vesen, tasol ol i no bin yusim KJV long kamapim "liberation theology" o tioloji i bin helpim long kamapim fridom tude bikos dispela i bin stat long Latin Amerika we pipel i bin yusim tokples Spein na Portugal Baibel.

"Sapos i gat tingting olsem i gat link long KJV wantaim Amerika, UK, Australia na Nu Silan i lukim gutpela wok kamap na demokrasi na sosio-ekonomik bilong kantri i ran gut, dispela i paulim pipel na i no stret. Ol dispela kantri i no bisi tumas long lotu na long autim tok olsem ol gutpela

samting bai kamap wantaim tingting long kisim nem long politiks na ikonmik sait wantaim giaman tingting long autim Gutnius i go long ol pipel olsem Jisas i bin dai long Diwai Kruse bai no helpim ol pipel em planti i no kisim ol gavman sevis," Mista Harricknen i tok.

Mista Harricknen i tok ol i bin kamapim KJV long Sios bilong Ingran i promotim sampela isu long sait bilong politiks na rilijen long Ingran moa long 400 krismas i go pinis.

"KJV em i impoten vesen bilong Baibel, tasol i no gat as long tok olsem em i moa gutpela o winim ol narapela Baibel vesen yumi gat tude".

Em i tok bihain long kamap bilong KJV, i gat planti moa vesen bilong Baibel we man i benefit long en, moa yet, bihain long ol i painim Koine Greek we ol lain i bin wokim tanimtok o trenslesen bilong KJV i no bin save long en.

"KJV em i impoten vesen bilong Baibel, tasol i no gat as long tok olsem em i moa gutpela o winim ol narapela

Baibel vesen yumi gat tude. Moa yet, ol dispela we ol i tanim hia long PNG olsem Tok Pisin Baibel o ol dispela ol i tanim long ol wan wan tokples. Tasol sampela grup insait long Bodi bilong ol Kristen Sios i putim KJV Baibel olsem em i moa gutpela long ol narapela, na dispelaem i pilai politiks ol grup i mekim," Mista Harricknen i tok.

Em i tok planti Kristen misineri i bin kam long PNG i no yusim KJV, tasol ol Baibel vesen long Inglis, Jerman, Frans na ol narapela long harim na autim Tok bilong God na olsem wanem bai KJV i winim ol narapela Baibel vesen we ol pipel bilong yumi i save holim pas na yusim.

Mista Harricknen i tok ol i yusim promosen bilong KJV long strongim sait bilong politit.

Em i tok i no olgeta Kristen long PNG i wanbel long dispel na em i kamap klia taim ol sampela bikpela sios i no stap long ol fanksen bilong welkamim dispel KJV Baibel.

Em i tok yumi no ken kisim olsem em i opisel stetmen i holim na banisim kantri muv long diklerim PNG olsem "Kristen Kantri" na sapos Praim Minista O'Neill o husat i tok long welkamim KJV long Jackson's ples balus.

Em i tok stetmen bilong Gren Sif Sir Michael Somare long 2007 we ol i tanim olsem nesanel plej long nupela kavannen i paulim ol pipel.

"Stat bilong PNG Mama Lo i bilong kantritok PNG em i Kristen kantri na long ol narapela i diklerim gen em yumi mas tingting na glasim gut long sait bilong veliu long rilijes fridom.

"Priembel na Nesanel Gols na Dairektiv Prinsipel bilong

Mama Lo em ol papa na fauna bilong kantri i bin skelim na glasim gut na kamapim long lukautim kantri bilong yumi. Yumi mas luksave na rispektim ol," Mista Harricknen i tok.

Em i tok yumi luksave long promosen bilong Kristen na gutpela na stretpela pasin long PNG, tasol long wokim ol stetmen i ken paulim ol narapela i no stret, na i ken kamapim bruk namel long pipel.

Mista Harricknen i tok i moa-beta long givim luksave long KJV olsem wanpela ekspensiv kopi long impoten trenslesen bilong Baibel, na putim long wanpela hap bilong sapel ol i laik bildim long Palamen.

Em i tok tu olsem ol i mas ritim na kisim mesej em i givim na no ken larim i sindaun nating.

"Long sindaunim long Haus Palamen na i no yusim i no mekim wanpela gutpela samting. Em i no inap pinisim ol pasin nogut na korapsen," Mista Harricknen i tok.

Em i tok long pinis bilong stetmen we William Powi em Gavana bilong Sauten Hailans i bin mekim long Julai 30, 2015, na we nau Katolik Profesenel Sosaiti i wok long salensim, i tok "Het (o lida) long Stet bilong yumi em i Het bilong Sios.

"Em i tru Kwin Elizabeth 11 i bos bilong Sios bilong Ingran, tasol em i no bos bilong sios long PNG.

Bikpela tingting long lukim KJV olsem em i bikpela samting (importance) long KJV na politikel demokrasi bilong Ingran em yumi ken lukim olsem nio-kolonielisim long PNG we em i wanpela indipenden kantri i lukautim em yet," Mista Harricknen i tok.

Kamapim tru pasin bilong tok sori na tanim bel

Dispela wik Trinde i bin wanpela pablik holide bilong kantri ol i kolim Ripentens De. Gavman i makim dispela de Ogas 26 olsem de bilong tok sori long ol pasin nogut bilong yumi, na tanim bel.

Aidia bilong gavman i makim wanpela kain de olsem i gutpela. Tasol i luk olsem sampela lain i yusim dispela de long paulim na pretim ol pipel bilong kantri.

Long las wik, i bin gat wanpela edvetaismen i kamap long ol niuspea we i pulim longpela stori tru long kirapim tingting bilong ol pipel long mekim sampela samting long makim dispela de.

I bin gat ol toktok bilong wokim bikpela paia na kukim ol tumbuna samting, na ol samting bilong mekim sanguma pasin, na ol giaman god bilong PNG yet na bilong ol ovasis kantri i stap insait long PNG. Olgeta paragraf long dispela longpela edvetaismen i karim ol ves na lain bilong Baibel na Nu Testamen long strongim kona bilong husat man i bin raitim dispela edvetaismen.

Tasol husat man i raitim dispela edvetaismen i no tokim ol pipel long kukim mani. Em i lusim ting olsem sampela man i save mangalim mani oltaim na em i kamap olsem god bilong ol.

I tru olsem Papua Niugini i wanpela Kristen kantri na ol pipel i fri long bihainim wanem kain lotu ol i bilip long en. Na ol pipel i fri tu long givim baksait long Kristen bilip na stap olsem ol haiden.

Em i laik bilong ol. Tasol konstitusen bilong yumi i tok klia tu

olsem no gat wanpela man i ken subim ol arapela long bihainim bilip o lotu bilong em. Dispela rait aninit long konstitusen em i lo bilong kantri na yumi no ken lusim ting long en.

Dispela de bilong ripentens o tok sori na tanim bel i ken kamap wanpela gutpela eksampel bilong trupela Kristen bilip bilong yumi sapos ol lida na yumi ol manmeri nating i yusim long soim trupela Kristen pasin.

I gat planti ples long kantri we pasin bilong pait namel long ol wanpisin na kilim nating ol manmeri na pikinini i wok long kamap yet. I gat ol pasin bilong sutim tok na kilim ol lapun na yangpela meri long wokim pasin sanguma.


I gat pasin bilong stilim graun bilong narapela lain i stap yet. I gat pasin bilong bagarapim ol yangpela man long hom bru na mariwana i stap yet. I gat pasin bilong stilim pablik mani i stap yet.

Orait sapos ol lida bilong wan wan ilektoret bilong kantri i trupela lida, bai ol i yusim dispela Ripentens De long go bek long ilektoret bilong ol na bung na pre wantaim pipel.

Orait bihain long pre, ol i mas tok sori long ol pipel na tokaut long wanem kain gutpela program o plen ol i gat long helpim pipel na stopim ol dispela kain hevi long ilektoret bilong ol.

Sapos ol lida i mekim olsem, bai i soim tru olsem wok bilong mekim Palamen i kamap klinpela haus bilong ol lida, i karim trupela kaikai. King James Baibel i stap insait long palamen nau na gutpela spirit

Jisas i soim tru pasin bilong tok sori na pogiv..
Na YUMI?



bilong Bikpela tu bai mekim wok long bel bilong ol politisen bilong yumi.

Pasin bilong toktok nating na kukim ol kaving na ol narapela tumbuna samting bai i no inap

helpim lida na ol pipel bilong em. Dispela pasin i salensim bilip bilong yumi long Tok bilong Bikpela na i abrusim namba wan mandato Jisas yet i givim yumi, "laikim Bikpela wantaim olgeta tingting na

bel bilong yumi na laikim ol arapela manmeri olsem yu laikim yu yet." Yumi bihainim dispela tok long taim yumi soim rispek na stap bel isi wantaim ol arapela manmeri.

Lidaman laik mekim lo

... tasol mas prea bung wantaim manmeri long soim rot

PAPUA Niugini i tok em i laik senis na kamap wanpela nambawan kantri long ol sindaun olsem Australia, Amerika o Ingran. Dispela i tingting bilong ol lidaman na manmeri.

Tasol ol yet i no bihainim na stap long kain laipstail we bai inap kamapim kain sindaun.

Dispela i driman tasol na bai stap driman yet bikos ol i stap nambaut, i bihainim laik bilong ol tasol.

Taim mipela i lukluk long Baibel, God yet i rot bilong kamapim gutpela sindaun. I no gat narapela rot manmeri i ken lukim gutpela sindaun inap long taim em i bihainim lo na stap gutpela pren bilong God. God yet bai soim em long wanem samting em bai mekim long kisim gutpela sindaun.

Long dispela as Papua Niugini i no ken tok em bai lukim gutpela sindaun olsem Australia o Amerika inap long em i tanim bel na i larim God i go pas long laip bilong em.

Ol lidaman i tok long bihainim God tasol ol i no bung



wantaim ol manmeri olsem Abraham, Aisak, Jakob na Moses i mekim.

Long olupela Testamen God i soim em yet ples klia long ol manmeri stat long taim em i mekim namba wan manmeri em Adam na Eva (Stat-Gen 1:28-30).

Olpela testamen i stori long planti kliapela prenpasin God i mekim wantaim ol manmeri long taim bilong Noah, Abraham, Aisak, Jakob na Moses.

Tasol em i ples klia olgeta taim Jisas, husat namba tu man God na husat i God son i kam daun, i kamap wankain olsem man na i stap wantaim man (Matt 1:23).

Jisas husat i lidaman, i

dokta, i pris i no mekim lo o tokim ol manmeri long bihainim lo tasol. Nogat. Olsem lidaman em i soim ol, i skulim ol long tok na lo bilong God, dokta i oraitim ol sikmanmeri na i pris i soim ol manmeri long prea na lotu.

Em i bung na i stap wantaim ol manmeri

Yes, Jisas i God tasol i kisim skin bilong man na olsem ol manmeri long dispela taim i aipas na i no save, maski ol disaipel bilong em yet tu i no save em i God inap long Jisas i dai, i kirap bek na i salim Holi Spirit i kam daun.

Long dispela taim ai na bel bilong ol i op na ol i luksave husat i Jisas i bin stap namel long ol.

Long dispela taim Pita wantaim ol disaipel i no pret tasol i tok strong long manmeri i mas tanim bel, i kisim Jisas long laip bilong ol na bihainim lo na pasin bilong em.

Ol politik manmeri i no ol pater na pasto husat bai givim olgeta taim bilong ol long mekim prea na lotu wantaim

ol manmeri. Em i no wok bilong ol.

Tasol ol yet taim ol i mekim lo olsem nau sampela Memba bilong Palamen i mekim long kisim Baibel i go long Palamen ol i mas long wankain taim bung wantaim ol arapela Memba bilong Palamen husat i gat tubel na strongim tingting bilong ol.

Em i gutpela pasin long putim Baibel long Palamen tasol pasin bilong ol Memba long tingting long ol yet na paulim pablik samting i mas senis.

Na ol dispela lidman i mas bung wantaim ol manmeri, i prea na lotu olsem taim bilong Moses na Davit, bai ol manmeri i ken tanim bel na givim ol yet long God Papa na larim God i go pas long laip bilong ol i skulim ol long rot bilong stap long dispela laip.

Taim ol i mekim olsem ol i ken tok Papua Niugini inap senis na kamap nambawan kantri olsem Australia na Amerika bikos God i go pas long ol.

Published Weekly, Thursday, for Word Publishing Company, Ltd.

P.O. Box 1982, Boroko, NCD
Papua New Guinea

Telephone: (675) 325 2500

Fax: (675) 325 2579

Email: editorial@wantok.com.pg

Websait: www.wantokniuspepa.com

Pe bilong wanpela yia, 52 niuspepa

| | |
|-----------------------|-------------|
| Ples: | Air: |
| PNG | K220.00 |
| AUSTRALIA | US\$110.00 |
| ASIA PACIFIC na JAPAN | US\$150.00 |
| AMERICA na EUROPE | US\$210.00 |

General Manager
Elizabeth Konga

Editor
Veronica Hatutasi

Published at Able Building Complex, Sec 58 Lot 02, Waigani Drive.

Word Publishing Company Limited is owned by the four major churches of Papua New Guinea - Catholic 55%, Lutheran 25%, Anglican 10%, United Church 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general term acceptance are available at Word Publishing Company Ltd and are set out full on the display advertising form.

Meri sanguma tanim bel

Sape Metta i raitim

SAPOS wanpela meri i ken tanim bel na lusim ol pasin bilong wok sanguma na ol arapela pasin nogut, ol arapela wanwok bilong em tu bai i ken bihainim na mekim wankain pasin na kamap gutpela man na meri insait long ol komyuniti.

Esther Mouware em i wanpela meri sanguma husat i kamapim pinis planti hevi insait long hauslain bilong em long Kenemba long Lowa Asaro long Daulo distrik, Isten Hailans.

Long taim Mouware i save wok strong long mekim pasin sanguma, em i gat namba na biknem insait long hauslain bilong em, na tu long distrik na provins.

“Mama i bin karim mi sampela taim long 1984, na taim mi kam aut long bel bilong mama, mi kam aut wantaim sanguma, samting we mama i bin i gat long taim em i karim mi,” Mouware i tok.

Em i tok insait long 31 yia em i bin wokim pasin sanguma i kam inap long Julai long dispela yia 2015, em i luksave olsem em i wok long bagarapim planti ol wanpisin lain bilong em yet long Kenemba hauslain na ol arapela lokal man na meri na pikinini long Asaro, Daulo

distrik, Isten Hailans na Papua Niugini tu.

Mouware i tok spirit bilong sanguma bilong em i olsem blak bokis na dispela spirit i save kisim em raun long distrik, provins na ol arapela provins olsem Lae long Morobe Provins, Madang, Maun Hagen, na Simbu provins long mekim wok sanguma.

Em i tok long wok bilong ol sanguma, ol i save wok aninit long bik bos bilong ol. Na sapos ol i na mekim gut wok bilong ol, bik bos i save givim promosen long ol na ol i ken surik i go antap long narapela level.

Taim Mouware i luksave long ol pasin nogut bilong en, em i luksave olsem em inap, na em i mas tanim bel na kamap gutpela meri, olsem na em bin go long wanpela ELC PNG Yut konprens long Rongo Seket long Lufa distrik long mun Julai long dispela yia.

Mouware i tanim bel long dispela konprens. Na long wanpela ELC PNG Goroka Seket konprens bilong ol pasto i bin kamap long Kenemba hauslain, em i kamap ples kliia na tokaut long ol wanpisin lain na ol sios pasto olsem em i lusim pasin sanguma.

Long wankain taim ol pasto, i kamapim spesel sevis we ol i givim

baptais na komyuniti sevis long makim luksave olsem Mauware i tanim bel. Long dispela taim tu, ol pasto i givim nupela nem Lydia Mouware long em.

Meri sanguma Esther Mouware (nau Lydia) i stap long olpela sanguma bilas bilong em.



OI ELC PNG Goroka Seket pasto i kamapim spesel baptais na komyuniti sevis bilong Esther Mouware, husat i tanim bel long Kenemba hauslain long Lowa Asaro. Nupela nem bilong em nau em Lydia. Ol foto: Sape Metta

Plak bilong Israel i flai long Gogodala

Aja Potabe i raitim

PLANTI manmeri bilong dispela kantri i save kisim filings nating long Israel na apim plak bilong en.

Planti taim long PNG taim ol manmeri i bung long selebretim independens de o taim ol pipel i bung long lotu, sampela i save apim plak bilong Israel.

Dispela i soim olsem sampela lain PNG i mas paul yet bikos kantri bilong yumi i no wanpela foren teritori bilong Israel o yumi i no bilong Israel.

Angliken Bisop bilong Pot Mosbi, Denny Bray Guka i salensim ol pipel long no ken apim nating plak bilong Israel long independens de bikos i gat plak bilong PNG - kantri bilong yumi.

Bisop Denny, husat i Siaman bilong PNG Kaunsil ov Sios (PNGCC), i tok sampela manmeri PNG i wok long tok ol i bilong Israel o ol i Juda manmeri. Wanpela bilong ol, em wanpela lain bilong Gogodala, Westen Provins.

“Sampela ol Gogodala i wok long tok ol i Juda manmeri na ol i wok long senisim pasin bilong lotu na mekim ol arapela samting long komyuniti bilong ol,” Bisop Denny i tok.

Tasol no gat wanpela samting i stap long tok tru olsem ol dispela Gogodala manmeri i wanpela bilong ol Juda manmeri husat i lus na i stap nabaut long wol.

“Tupela yia bin i go pinis, mi bin go long Westen Provins taim ol manmeri long hap i bin kisim wanpela profesa bilong mekim stadi bilong kalsa bilong ol Juda.”

“Dispela profesa i bin kisim ol blut

bilong manmeri Gogodala i go bek long Amerika tasol em i no bin tokaut sapos ol Gogodala i tru tru Juda manmeri,” Bisop Denny i tok.

Tasol wanpela sios lida meri long Balimo, Westen i tok ol Gogodala manmeri i luksave pinis long God bilong Israel.

Dispela meri, Mai Wasewa i tok ol Gogodala nau i wok long senisim pasin bilong lotu na sios tu i senis pinis.

“Pasin bilong lotu i senis long Gogodala eria. Mi save lotu long Evanjelikel Sios ov PNG (ECPNG) we papa bilong mi em i wanpela namba wan man long kisim tok bilong God i go antap long Hela na Sauten Hailans.”

“Tasol nau mipela kamapim nupela pasin bilong lotu na nupela sios. Dispela nupela sios em mipela i kolim Kongrigesen ov Evanjelikel Sios (CEC),” Wasewa i tok.

Em i tok CEC i save bihainim pasin lotu bilong ol Kristen na Judaisim wantaim. Kristen pasin i bilong lotu we planti bilong yumi ol manmeri PNG i save bihainim.

Em i dispela lotu we ol misineri i bin kisim i kam wantaim Tok bilong God na yumi luksave long Jisas olsem man husat i bin dai long sin bilong yumi na sevim yumi.

Tasol Judaisim em i lotu bilong ol Juda o manmeri Israel. Tude ol Gogodala manmeri i wok long bihainim tupela lotu wantaim.

Wantok Niuspepa i painimaut olsem dispela profesa bilong mekim stadi bilong Jew kalsa em i Tudor Pattif bilong Florida Intenesenel Yunivesiti long Amerika. Narapela nem bilong Pattif em i ‘British Indiana Jones’.

Gavana bilong Westen Ati Wobiro i bin tokaut tu olsem em i wok long go kam long Israel long mekim ol stadi long sekim sapos ol Gogodala em ol tru tru Juda manmeri.

Las yia, em i bin tokim ol manmeri long ECPNG Sios long Gerehu olsem PNG i mas lukluk long Israel long sapot bilong en bikos Israel em i tru tru kantri we God i holim long han bilong en yet.

Long bung bilong ECPNG Sios, ol sios mama long Gogodala eria i save bilas long ol meri blaus i gat kala bilong plak bilong Israel.

OI man Gogodala tu i wok long apim plak bilong Israel. Planti ol manmeri Gogodala i save lotu long ECPNG Sios tasol nau ol i wok long lusim isi isi na joinim CEC, Wasewa i tok.




Plak bilong Israel i bin flai antap long ples balus long Mosbi long taim ol manmeri i wetim Palamen Spika Theo Zurenuoc long karim King James Vesen Buk Baibel i kam long Amerika long mun Epril.



OI manmeri Morobe i holim na apim plak bilong Israel long Lae tripela wik i go pinis long taim bilong opim Lae Laif Impruvmen long Sir Ignatius Kilage Stedium.

Wol stok maket i kisim taim nogut tru bihain long sea bilong Saina i pundaun



STOK MAKET: Ol i bin fosim Nu Yok Stok Eksens long wokim spesel prais lukaut plen bihain long ol sea long Saina i pundaun i go daun olgeta long 9 pesen na kamapim hevi long wol sea maket. Poto: long ABC na AFP: Getty Images

Ol sea maket long wol i pundaun bihain long ol sea bilong Saina i sutim nus na pundaun i go daun long 9 pesen mak olgeta. Tasol ol komoditi na dola pundaun wantaim tu ol stok bilong US i bin wokim gut bihain long ol maket long Yurop i pas.

Ol sea long Australia i bin lusim Au\$64b taim Saina i go daun long 'Black Monday'.

Bihain long pundaun i go daun moa long 1,000 points, o klostu 7 pesen taim Wall Street i op bek, Dow Jones industriyel avrej i bin go daun isi isi long 3.55 pesen taim maket i pas.

Standard & Poor's 500 indeks i bin go daun long 3.93 pe sen. Pastaim em i bin go daun long 10 pe sen aninit long bikpela mak em i save inapim long en.

Wolverine ekta bai wokim konset long Australia



WOLVERINE JACKMAN: Wanpela biknem muvi ekta planti i save long en long ekt long muvi, Wolverine, em Hugh Jackman na meri bilong en, Deborah-Lee Furness i raun i go long Australia bihain long 10-pela krismas. Poto: ABC

Ekta Hugh Jackman i stap nau long Oz o Australia long promotim singsing na singim ol feveret singsing bilong em long wanpela konset bai kamap long mun Novemba.

Wanpela feveret namba bilong Hugh em, "I still Call Australia Home."

Tony Awod-wina na ekta i kam long Australia long wokim konset raun long 5-pela siti ol i kolim long Hugh Jackman — Broadway to Oz long Novemba na Desemba.

Konset bai gat 150 musik manmeri, ol ekta na ol narapela singa we i bihainim prodaksen em i bin kamapim long Nu Yok ol i kolim Hugh Jackman: Back on Broadway.

"Dispela em ol singsing mi save laikim long ol muvi na ol so mi bin stap insait long ol olsem - Les Miserables, The Boy From Oz —

na ol narapela so mi save laik stap insait long ol," Jackman said.

Muvi ekta bilong Wolverine i tok em i no save ritim ol samting ol i raitim long em long ol niuspea, tasol em i tok em i luksave taim meri bilong em i no slip long taim ol i lukim muvi long Nu Yok na em i no slip.

Dispela em wanpela long ol las konset ol bai holim long Sydney Entateinmen Senta we klostu taim, ol bai daunim.

Jackman i tok em bai no inap lusim tingting konset we leit singa na singsing raita, Peter Allen husat i bin singim I Still Call Australia Home taim ol i bin opim veniu long yia 1988.

"Mi tingim lukim dispela konset wantaim brata bilong mi, na mi tingim ol i daunim bikpela plak," em i tok.

Ol robot bai tekova

Wanpela ripot i tok bai no gat wok long planti sumatin i pinisim skul long Australia bikos ol robot o ol masin we ol i kontrolim bai mekim wok.

Nupela ripot bilong Foundation for Young Australians i tok mak long 60 pesen bilong ol yangpela sumatin i kisim trening long wok bai no gat, ol otomesen masin bai tekova.

Ripot i tok insait long 10-pela yia i kam, mak long 44 pesen ol wok em ol otomesen masin bai wokim, 60 pesen long ol sumatin i wok long kisim trening long ol wok bai no inap stap, tasol bai no gat moa na ol yangpela pipel bai senisim wok inap long 17-pela taim, o, ol bai gat 17-pela ol narakain wok.

Pasifik Osen klinap



OSEN KLINAP KRU WANTAIM OL MONSTA NET: Ol pipia long "Great Pacific Garbage Patch" i gat long en ol liklik hap plastik i go long ol bikpela net olsem dispela long poto. Poto: ABC

Ol risets lain i wokim ol sempol long bikpela pipia long Pasifik Osen olsem hap bilong wok klinap proposel ol i gat long en.

Ol risets lain i kam bek pinis long mekim sevei o wok painim long bikpela na planti pipia i pulap antap long bikpela solwara long namel bilong Pasifik Osen, olsem hap bilong klinap long klinim ples program.

Kru bilong Osen Klinap wantaim ol volantia long ol seling bot i bin go bek long San Francisco bihain long ol sevei wok na kolim "Great Pacific Garbage Patch" — em ol kain miks pipia we man na netsa i wokim. Em i karamapim bikpela eria olsem handet mail

bilong open si o solwara. Ol plastik pipia i winim mak bilong ol pipel yet na tu netsa.

Ol pipia i save stap long "convergence zone" klostu long ol ailan bilong Hawaii, namel long Japan na Amerika na US wes kos.

Grup i bin mekim sevei wok long hap long wanpela mun na ol i bin bungim ol sempol i stat long liklik pipia olsem wesan i go long ol bikpela net bilong pis hevi i winim 2,000 paun.

Ol i bin painim moa plastik, long mak i winim wan handet taim moa, ol narapela pipia, osenografa, Julia Reisser i tok.

New South Wales i kisim taim nogut



TAIM NOGUT: Taitwara i karamapim Glebe, wanpela sabeb bilong Sydney, bihain long bikpela ren na win. Poto: ABC

Ol 35 pipel i bungim hevi na ol i sevim ol na planti handet i singaut long helpim long taim nogut i bungim New South Wales.

Ol imejensi kru i wok long redi long moa taim nogut long New South Wales bihain long bikpela wan ren na strongpela win i kamapim bikpela taitwara na bagarapim ol ples bihain long mini raunwin i kamap long sentrel wes bilong New South Wales.

Stet Imejensi Sevis i bin givim helpim i go

long 600 lain i bin singaut long telepon long helpim. Ol i bin sevim moa long 35 pipel i kisim bagarap long taitwara.

Bikpela ren na strongpela win i kamapim bagarap long Sydney na Illawarra eria. Ol i ripotim samting olsem 176 milimita ren i pundaun long Bellambi long noten Wollongong.

Planti bagarap i kamap long noten rijon long Bulli na Woonona.



OL ROBOT BAI TEKOVA: Ol yangpela pipel long Australia bai gat hevi long wok bikos ol robot olsem dispela long poto bai mekim wok. Poto: ABC

Stori bilong tumbuna

Tupela tarangau mekim pati

TUPELA tarangau i no bilong bus, tupela i save raun long ples tasol.

Wanpela blakpela i raun antap long skai na narapela waitpela i raun long nait.

Tupela i bung na tok olsem; "insait long wanpela mun, mitupela i bungim sampela abus.

Orait, mitupela i mekim pati na ol liklik pisin i kam na yumi bung na kaikai wantaim.

Tupela i pasim tok pinis na i go. Waitpela tarangau i raun long nait na kilim rat na kapul tasol. Blakpela tarangau ol man-meri i wok long gaden i stap na em i lukluk i kam na kisim liklik binatang snek long graun (worm) na bungim.

Tripela wik i pinis, waitpela tarangau ya i toksave long narapela na tok olsem, tripela wik pinis na wanpela wik tasol i stap.

Yu yet i painim ples bilong kuk, bungim ston na paiwud na ol samting. Mi yet bai mekim olsem tu.

Yu yet kuk pinis orait, rausim na karim i kam long mi na mitupela i singautim ol liklik wantok bilong yumi i kam, orait, yumi kaikai wantaim.

Em i toksave pinis na em yet i bungim ston, paiawud na banana lip. Olgeta samting ol i bungim pinis na long Fraide moning tru, ol i kuk pinis na wet i stap.

Blakpela tarangau ya i kukim ston pinis na olgeta abus i stap olsem, i go lukim ya nogat, olgeta liklik binatang snek sting pinis na i stap.

Em i belhevi na lusim ples bilong kuk na i go long narapela brata bilong em kuk i stap na tok save olsem; olgeta abus bilong mi i sting pinis, mi no luksave long ol, olsem na mi kam.

Ol liklik brata bilong tupela i kam orait yumi kaikai wantaim.

Waitpela tarangau ya i belhat na kisim paiawut, kukim ston long en, hap longpela i stap kisim na paitim em. Narapela tu i painim paiawut na kisim sit bilong em.

Tupela tarangau tasol kala bilong tupela i narapela kain. Waitpela i olsem sit bilong paia na blakpela i olsem hap paiawut i kuk pinis na hap i stap kisim na paitim em olsem blakpela.

**Mr. K Muratie Ton
Mt. Hagen**

TOKSAVE:

WANTOK i askim ol gutpela rida bilong em long salim ol tumbuna stori i kam na bai mipela i putim long niuspepa. Sapos stori bilong yu i gutpela na mipela i putim long niuspepa, bai yu winim **K50** we mipela bai salim i go long akaun bilong yu, o salim mobail yunit inap long **K50** i kam long fon bilong yu. Salim nem, edres na mobail namba bilong yu wantaim stori i kam long dispela edres: *Stori Tumbuna, Wantok Niuspepa, C/Word Publishing Company, P O Box 1982, BOROKO, NCD, PNG* o email edres: editorial@wantok.com.pg Telepon namba: 3252500. Tenkyu

Raun wantaim Wantok kru ...

Mannus De i pulim planti lain long Mosbi

Nicky Bernard i raitim

MANUS DE i pulim olgeta manmeri na pikinini bilong Manus long go amamasim de bilong ol long Kontisunel Pak long Waigani insait long Mosbi.

Planti ol manmeri i kisim dispela pablik malolo long asde, Trinde long go raun na lukim dispela de bilong ol Manus.

Manus De i save kamap long pinis bilong mun Ogas, na dispela pablik malolo i givim sans long ol Manus long amamasim de bilong ol.

Dispela pablik malolo em gavman i tok orait long ol manmeri na pikinini bilong PNG long kisim long pre na tok sori.

Manus Provins em ol strongpela lain bilong lotu tasol dispela de ol kisim long tingim provins ol we ol i kam long en.

Planti ol samting bilong ol tumbuna bilong Manus i bin kamap long dispela de, maski planti toktok i bin kamap long rausim ol tumbuna pasin tasol Manus i holim yet tum-

buna pasin bilong ol.

Dispela de ol lain Manus long Mosbi i bin amamas na bung wantaim. Planti bilong ol Manus long Mosbi tu i no save bung, long wanem, ol slip na wok long kainkain hap long Mosbi Siti na dispela de olgeta kam bung na lukim pes bilong ol.

Planti bilong ol hapkas Manus tu bin go na amamasim dispela de long wanem ol save olsem hap blut bilong em bai long Manus Ailan.

Gavana bilong NCD Powes Parkop, i singaut long ol manmeri bilong Manus long wok bung wantaim ol narapela long lukautim Pot Mosbi. Em i tokim ol manmeri bilong Manus long dispela de long mekim NCD kam gut olsem liklik ples bilong ol long Manus.

Dispela Manus de em ol Manus sumatin bilong Yunivesiti bilong PNG i bin go pas long en na Gavana Parkop i givim K10,000 long ol. Gavana Parkop i save givim K10,000 long olgeta Provins taim ol save amamasim provinsal de bilong ol long NCD.



MERI MANUS YU STAP WE? Manus De long Mosbi i lukim kainkain stail bilong ol olsem long poto ya: *Poto Nicky Bernard.*



TAMBUL BAGARAP: Ol pipel long Tambul long Westen Hailans provins i kisim taim no gut na bagarap long frost.

Long dispela wik, Praim Minista, Peter O'Neill i bin raun i go long hap wantaim Minista na memba bilong Tambul/Nebilyer, Benjamin Poponawa.

Long poto, ol yangpela man i soim Mista O'Neill na Poponawa ol bagarap long ol gaden kaikai we frost i kamapim na

pipel i sot long kaikai nau.

Las wik, Gavman i bin oraitim K5 milien long baim ol rilif kaikai na salim i go long ol ples long hailans rijon i kisim bikpela bagarap na pipel i sot long kaikai na hangere i stap.

Aste tasol, Nesenel Eksekutiv Kaunsel i bin tok oraitim manimak inap long K25 milien bilong helpim ol pipel long kantri we bikpela san na frost i bagarapim ol. *Poto na stori: PM Midia*

Em nau! Ol pikinini i ken painim rot i go long ples wantaim Wantok kru...



Papua Kanage

Wanpela wiken, boi i kalap long balus na go long Rabaul. Em i go long lukim ol bagarap maunten paia i kamapim. Balus i go kamap long Rabaul ples balus na Kanage i lusim balus na go ausait.

Em i lukim wanpela yangpela meri Tolai sanap ausait long teminel na em i askim meri long Tok Inglis olsem, "Hey lady, is this Rabaul town?"

Meri Tolai i kirap na bekim. "Em nau."

Kanage i paul na askim gen na meri ya i mekim wankain toktok.

Kanage i belhat na tokim dispela yangpela meri Tolai olsem, "Oh no. It seems that she is trying to trap me. This is not Rabaul. Em i tok olsem pinis na kalap long balus na go bek long Mosbi.

Samting tru i olsem, Kanage i no save long Tok Pisin. Em i save long Tok Inglis tasol. Watpo? Bikos em i bilong Papua yah.

Lapun Hookworm
Lae

Wewak Kanage

Kanage i go painim buai long Wewak maket i stap na harim ol manmeri i singaut nabaut na tok olsem tupela meri i pait long wanpela man.

Em i harim olsem na givim 20t i go long wanpela lapun mama na sindaun i go daun long kisim buai. Taim em i wok long kisim buai, ol manmeri i singaut moa na bikmaus i stap.

Kanage i harim i go no gat, na em i askim lapun mama.



Lapun mama i kirap na tokim Kanage olsem.

"Bipo long taim bilong mipela ol lapun mama, mipela i save pait long dispela hap bun bilong pik. Tasol long nau long dispela taim ol wait man i brigim na kamapim kain kain samting. Asua bilong ol wait man na nau tupela yangpela i wok long kros pait long samting ya banana."


Kanage ya harim lapun ya tok olsem na em i lap no gut tru. Mama, dispela fasin filong yufela Sifil na mipela i save les. Fikos yufela i no save fihainim lo filong Faifel i staf long Matyu 7:7

Wantok man
Wewak.

Ansa bilong Wod Pilai isu 2136



EM ORAIT




EM NOGUT

Ol wod lista hia:

- APLIKEN
- AUPA
- BLUPELA
- BUSKANAKA
- DRAIPELA
- DUKDUK
- GREDA
- GRISMAN
- GUTAIM
- HAISAPIM
- HIVAPIM
- HEPI
- IMPLINTESEN
- ISTA
- KEMPEN
- KOKOROS
- KRUNGUTIM
- LEKTRIK
- LIMLIMBUR
- LOTUIM
- MASALAI
- MINISTRI
- NEKS
- OGANAISESEN
- PAINIMAUT

O E H G N H H G J P G N N D S D M L A H
 A O T K U H S E U Q Y C K P H U A F F J
 G L M F L W H G P W G I O R E K V C F L
 D E J X A D M P Q I R A N N E D C E Y T
 T C P R T I N S R T P Y E E E U F E I E
 T A F Q A I P H K U X A O K M K H E T O
 O D I T I P R E A M I N I S T R I K E A
 S K U A E I L D A Y M A M N N A G R I C
 T G H B D T W I R R L T P B I A H U M F
 N I L L E K E R K A F S L S K M N N L H
 T E T U A O I A S E I M I A S K A G L Y
 C N O P F K P A L G N P N E H U X U O W
 S E T E L O M Q I R X A E X I S I T T D
 O T F L O R E C M I K I N L V G G I U E
 U G L A D O R L L S I S T A A R A M I Y
 K R H A I S A P U M M K E M P E N F M F
 C R L G M S K B M A R W S E I D S D M S
 D E E T X W V E B N P T E A M A B E S L
 F U S O E Y I F U O G A N A I S E S E N
 E R J G Z V H N R E E H G N S R S S J J





TOK PISIN NEWS

from Radio Australia
radioaustralia.net.au

Harim TOK PISIN long
Radio Australia
101.9FM
Port Moresby

| | |
|-------------------|-----------------------------|
| Tok Pisin Service | |
| 6am - 7am | 6080; 7240(KHZ) |
| 7pm - 9pm | 5995; 6020; 9710; 1280(KHZ) |



Ol Ni-Vanuatu Sisonal woka long Australia



Ol liklik paia anis i bagarapim Solomon Ailan.

Ol foto: ABC

PNG Gavman i yusim K25 milien long helpim pipel

DAIREKTA bilong Bible Faith Outreach Charity long Westen Hailans, Rose Kepo i tokim ABC Nius olsem gavman i no ken yusim K25 milien long makim 40 Independens Aniveseri bilong kantri long mun Septemba, na i mas givim dispela mani i go long ol pipel husat i bungim hevi long wara na kaikai i sot, long Hailans rijon.

Rosa Kepo, i save lukautim ol pikinini long Hagen husat i no gat ol papamama. Dispela provins wankain olsem ol narapla ples long Hailans, i wok long kisim taim bikos i no gat ren na bikpela kol i wok long bagarapim planti gaden kaikai, na wara i sot.

Ol memba bilong palamen bai kisim K100,000, na ol gavana bai kisim K500,000 na tripela bikpela taun olsem Hagen, Lae na Kokopo bai kisim K500,000 long selebretim Independens aniveseri.

Misis Kepo i tokim Redio Australia olsem gavman i bin lusim planti mani pinis long Pasifik Gems na dispela K25 milien i mas go long helpim ol pipel.

Solomon Ailans disasta wok

GAVMAN i wokbung wantaim ol narapela lain long putim Provinsal Imejensi Operesen Senta long olgeta hap bilong kantri

ABC ripot i tok Gavman bilong Solomon Ailan i kisim helpim bilong Yuropean Union long kamapim ol Provinsal Imejensi Operesen Senta long ol wan wan provinsi long kantri.

Dairekta bilong Nesenel Disasta Manesmen Opis, Loti Yates i tok dispela bai mekim wok i isi long helpim

ol komyuniti long olgeta hap bilong kantri i kisim helpim hariap long taim bilong disasta.

Mista Yates i tok i kam inap nau, ol pipel husat i save nidim helpim i save wet longpela taim tumas.

Enga pipel i pilim taim bilong hangre

LIDA bilong Gutnius Luteran Sios long Sirunki long Enga Provins i tok ol pipel long komyuniti bilong em nau i stap wantaim hangre bikos ol i sot long kaikai.

Ples i drai long wanem no gat ren i pundaun longpela taim nau. Lida bilong sios Reveren Daniel Watato i toktok wantaim ABC long dispela hevi bilong ol pipel. Em i tok ol pipel long komyuniti bilong em nau i stap hangre na i nidim helpim.

Reveren Daniel Watato i tok ol pipel i wok long strong long ol kaikai long garden we i no dai o sting yet. Em i tok bihain long dispela, bai ol i sot olgeta long kaikai.

Reveren Watato i tok bikpela san long tripela mun i draim wara na ol gaden kaikai na ais i bin pundaun long foapela de na i kilim olgeta kaikai long gaden.

Em i tok samting olsem 300,000 pipel bilong Enga i painim dispela hevi nau.

Em i tok ol nesenel lida bilong ol i bin flai long helikopta na lukluk raun na tokim ol lokal kaunsil long raitim ripot, tasol ol i no harim wanpela toktok yet.

Australia i mas lukautim gut ol sisonel woka bilong Pasifik

HET bilong Leba Dipatmen bilong Vanuatu i tok Australia i mas mekim olgeta

wok em i ken mekim long lukautim ol wokman na meri bilong ol Pasifik Ailan kantri long taim ol i go wok long Australia.

Komisina bilong Labour long Vanuatu, Lionel Kaluat i mekim dispela toktok bihain long wanpela bikpela miting bilong Pacer Plus em Australia, Nu Silan na ol Pasifik Ailan kantri i bin kamap long en long Samoa long tupela wik i go pinis.

Toktok bilong em i bihainim tu tingting bilong Australia long apim mak bilong ol wokman na meri bilong Pasifik long go wok long Australia.

Ol kantri olsem Fiji, Kiribati, Tonga, Papua Niugini, Tuvalu, Vanuatu na Solomon Ailan i save salim ol woka bilong ol i go wok long Australia.

Mista Kaluat i tok ol Pasifik kantri i save long sampela bos bilong ol kampani long Australia husat i no save mekim gutpela pasin long ol woka bilong Pasifik.

Planti moa bilong ol dispela Pasifik Ailan woka i save go wok long Nu Silan.

Sampela hap bilong Westen Hailans i hangre

OL pipel bilong Westen Hailans Provins i gat hevi nau long painim kaikai bikos i no gat ren longpela taim na ol gaden kaikai i drai nabaut.

Grace Joyce wanpela meri bilong ples Bubunga long Mul/Bayier Distrik i tok, wari bilong ol em long bikpela san na no gat ren.

Em i tok tripela mun i no gat ren na ol gaden kaikai i dai pinis.

Ms Joyce i tok pipel long distrik i hangre na i laik gavman i mas helpim ol.

Liklik retpela anis i bagarapim

Solomon Ailan

JOHN FASI bilong Solomon Ailan husat i wokim PhD stadi long School of Biological Sciences long Yuni-versiti bilong Kwinlan i wok long stadi long ol dispela retpela anis na em i toktok wantaim ABC long dispela hevi.

Dispela anis i wok long kamapim bikpela hevi long Solomon Ailan nau na i save stap tu long sampela hap bilong Papua Niugini na Vanuatu.

Mista Fasi i tok dispela liklik retpela anis, i save kamapim bikpela pen tru long taim em i pas long skin bilong man na i save mekim ol dok na pusi i kamap aipas.

Em i tok long Solomon Ailan, bai i no isi long rausim olgeta dispela anis bikos em i go nabaut long planti hap bilong kantri pinis.

Vanuatu Kwarantintin i painim ol rat long kago i kam long Saina

OL Kwarantintin na Inspeksion sevis opisa long Vanuatu i kilim dai ol rat na i kukim kago bilong kakaruk lek ol i bin painim long wanpela kago kontena long wik i go pinis.

Namba wan Baiosekyuriti Opisa bilong Vanuatu, Francis Qarani i tok em i bikpela samting long ol i mas was gut long ol kain kain impot i kam long ol kantri long Asia olsem Saina.

Em i mekim dispela toktok bihain long ol i painim sampela rat insait long wanpela kontena bilong ol lek bilong kakaruk we sampela Asia lain i bin hait na kisim i kam insait long kantri.

Mista Qarani i tok ol Kwarantintin na Inspeksion Sevis opisa i kilim ol rat na i kukim ol kago long insinereta.

Em i tok ol kain kain animal na diwai samting bilong

ol narapela kantri inap givim sik o bagarapim Vanuatu sapos kantri i no was gut.

Westen Provins long Solomon Ailan i sot long kaikai

PRIMIA bilong Westen Provins long Solomon Ailan, George Lilo i tokim ABC nius olsem ol pipel long sampela hap bilong provins i nidim helpim bilong gavman bikos ol i sot long kaikai.

Primia Lilo i tok bikpela san we no gat ren em El Nino, i kamapim bagarap long ol gaden kaikai na tu i mekim ol wara i drai na kamapim bikpela wari long komyuniti.

Em i tok gavman i bin givim wan handet tausen dola pinis long ol Palaman memba long givim i go long ol pipel, tasol em i tok dispela mani i no inap.

Long liklik ailan bilong Gizo we kapital bilong Westen Provins i stap long en, ol i gat hevi tu we wara i sot.

Solomon Ailan, wankain olsem ol narapela kantri long Pasifik olsem Papua Niugini nau i wok long bungim hevi bilong wara na kaikai i sot.

Ol i paitim wanpela Esia bisnisman long Buka

WANPELA Esia man husat i marit long Bogenvil na i papa bilong wanpela stua, i stap nau long haus sik bihain long em i kisim sampela bagarap long wanpela pait long Buka taun.

ABC ripot i tok ol i kisim ripot long Buka olsem dispela trabel i bin stat long sampela wik i go pinis bihain long ol i bin sutim tok long dispela Esia man long sutim wanpela sif long ston.

Ol wanpisin bilong dispela

sif i bin go na askim dispela man long baim sampela kompensesen tasol em i no bin mekim.

Long dispela wik ol i bin go bek askim em gen long stretim dispela askim bilong ol, tasol no gat gutpela toktok i kamap olsem na trabel i bin kamap.

Planti pipel long Bogenvil i no wanbel long sampela pipel bilong Esia nau i ranim ol liklik bisnis we ol i ting ol lokal pipel tasol i mas gat ol dispela bisnis.

Solomon Ailan minista i raus long wok

PRAIM MINISTA Manasseh Sogavare i rausim kontrovesal apointment bilong Bodo Detkke olsem Minista bilong Forestri long Solomon Ailan.

CEO bilong Forum Solomon Ailan NGO, Benjamin Afuga i tokim ABC nius olsem gavman i mekim wanpela risafel long sikispela kabinet minista bilong em long dispel wik.

Mista Sogavare i tok nupela Minista bilong Forestri, Bartholomew Parapolo i no gat koneksen long bisnis bilong loging, na bai em i gat rispek nasapot bilong ol gavman opisa na ol lain long forestri bisnis long kantri.

CEO bilong Forum Solomon Ailan NGO, Benjamin Afuga i tok ol NGO grup long Solomon Ailan i lukim dispela disisen bilong praim minista olsem em i harim tok bilong ol.

Em i tok Mista Dettke i gat loging bisnis na em i 'konflik ov intres' o em i no stret long ol i makim em olsem Minista bilong Forestri.

Tasol Mista Afuga i tok Bodo Dettke i gat bisnis intres tu long nupela ministri bilong en long Turis na bai ol i lukluk gut moa long dispela

Malaysia kampani na PNG gavman sainim agrimen bilong Sepik plein.

Stanley Nondol i raitim

NESENEL gavman i sainim agrimen wantaim wanpela bikpela oil pam kampani long wol, Kuala Lumpur Kepong (KLK) long divelopim Sepik plein long kamapim wel pam projek.

Seketery bilong Tred, Komes na Industri John Andrias i makim gavman na i sainim agrimen wantaim KLK long dispela wik long gavman haus, Pot Mosbi.

Dispela agrimen i givim tok orait long KLK bai wokim fesibiliti stadi, divelopim envairomen plen na bai go het long divelopim bikpela wel pam projek long kantri.

Sepik Plein em bikpela egrikalsa flet gras len long kantri na i gat moa long 500,000 hekta bilong graun

long wokim ol egrikalsa projek.

Sepik Plein i stat i karamapim Wewak i go long Angoram, Yangoru-Saussia, Maprik, Wosera-Gawi na Ambunti- Drekikir distrik long Is Sepik na i go moa yet long Nuku long Sandaun povins.

Dispela wel pam projek bai wanpela bilong planti egrikalsa projek long Sepik Plein ikonomi Jon.

Divelopa bilong Sepik Plein Oil Pam projek, KLK i stap long lis bilong Bursa Malaysia Sekuriti Berhad wantaim kepitel bilong em long maket i sanap long sampela bilien Kina long Septemba 2014. Na KLK i gat moa long 100 yia eksperiens long wok egrikalsa na winmani bilong em i sanap moa long 10 bilien kina.

Memba bilong Yangoru Saussia

na Minista bilong Tred na Komes, Richard Maru i tok tenkyu long bot na menesmen bilong KLK long i gat bilip long wok wantaim gavman bilong PNG long kamapim bikpela egrikalsa projek long kantri.

Mista Maru i tok ol pipel bilong Sepik i wet long 40 yia long kamapim bikpela egrikalsa projek long Sepik Plein wantaim ol divelopmen patna na dispela taim i kamap.

Minista Maru i tok ol planti kampani long wol i bin soim laik long divelopim egrikalsa projek long Sepik na gavman i go pas long wok wantaim ol dispela kampani long divelopim ol projek.

Divelopa bilong projek, KLKi tokaut olsem kampani bai lukluk long welpam projek tasol na i long timba bisnis.



Seketery bilong Tred, Komes na Industri John Andrias i sainim Sepik Plein projek agrimen wantaim divelopa bilong Malaysia, KLK long gavman haus, Konedobu, Pot Mosbi.

Bung bai kamap long skelim hevi bilong kopi bisnis

Stanley Nondol i raitim

WANPELA bung bilong kopi bisnis bai kamap long Goroka long dispela mun na bai lukluk long hevi bilong ekspot i wok long punbdaun long wol maket na ol arapela hevi kopi indastri i bungim long dispela taim.

Hailans Famas Asosisen i tok kopi bisnis i bungim bikpela hevi na prodaksen bilong 2015 bai pundaun kam daun na winim prodaksen bilong 2014.

Presiden bilong Asosiesen, Wilson Thompson i tok ol 2000 kopi fama bin givim wanpela petisen i go long palamen pinis long ol hevi kopi indastri i bungim. Asosiesen i singaut long gavman long sapotim ol kopi fama we moa long 2 milien manmeri bilong kantri i save strong long en.

Ol patna bilong kopi olsem ol kopi ekspota, plantasin. Ol kopi blok, ol liklik groa, na ol lida long palamen, na ol gavman ejensi bai kamap long dispela bung long Ogas 27 na 28 long Goroka.

Hailans Famas na Setlas Asosiesen i tok taim petisen bilong

ol 2000 fama i stap yet wantaim gavman, Asosisen i no laik kopi indastri i pundaun. Em i tok em i makim ol kopi fama na bai kamapim dispela bung long toktok moa long hevi ol fama i bungim.

Hailans Fama na Setlas Asosisen i bin kamap long 1953 na bikpela namba bilong ol kopi diwai nau i olpela na ol i winim moa long 60 krismas pinis na no inap long karim planti kopi prut. Dispela i wanpela as bilong prodaksen i stap daunbilo.

Mista Thompson i tok nesanel gavman i laikim kantri bai salim 6 milien kopi bek long wol maket long yia 2030 na 2 milien bek long 2020 tasol i luk olsem dispela bai no inap kamap.

Em i tok yumi kamap namel long 2030 na yumi i no kam klostu yet long bungim mak gavman i laikim.

Mista Thompson i tok ol wankain hevi tu i bungim ol arapela egrikalsa krop na laipstok na Dipatmen bilong Praim Minista na Dipatmen bilong Nesanel Plening i mas kamapim rivi long Visen 2030, PNG Stretejik Divelopmen Program 2030 na Mid-

ium Tem Divelopmen Streteji 2017.

Mista Thompson i tok rot we egrikalsa sekta i ran nau em i stap long mak nogut na namba bilong ekspot i wok long pundaun na kantri bai no inap long bungim ol mak bilong ekspot we gavman i makim long ol plen bilong en.

Hailans Famas Asosisen i gat bikpela wari long ol kaikai egrikalsa prodak i pundaun bikpela tru na laikim gavman long lukim ol dispela hevi na kamapim rot na sapot long helpim ol fama na kantri long stretim ol hevi.

Mista Thompson i tok i gat nid long ol fama i bai kisim sapot long planim nupela kopi diwai, stretim ol faktori, kontrolim kwaliti, kisim mani helpim long ol benk na gavman na i laikim olgeta stekholda na Dipatmen bilong Egrikalsa na Laipstok o DAL na CIC i mas harim krai bilong ol fama na helpim ol.

Mista Thompson i tok gavman i putim bikpela mani long stretim ol rot, daunim prais bilong transpot, stretim pawa saplai na ol arapela infrastraka tasol mak bilong egrikalsa prodaksen i wok long pundaun yet.




INVESTMEN TOKTOK wantaim Dokta Stephen Nash

Wanem samting i save kamapim senis long Wok bilong Nambawan Super - Namba tri hap: Ol Propeti

Sapos yu gat sampela askim, plis salim long toktoksuper@nambawansuper.com.pg na mipela bai bekim.

Wankain toktok olsem yumi bin toktok long las mun, em olsem em i gutpela long yumi mas luksave long ol hevi we i save kamap wantaim ol kain, kain invesmen. Yumi mas luksave long hevi bilong invesmen pastaim long yumi ken toktok long wanem kain mani bai dispela invesmen i kamapim.

Taim yumi skelim hevi bilong invesmen long wan, wan yia wantaim hamas mani bai inap kamap long wankain yia long ol propeti, olsem yumi skelim wantaim ol narapela aset, em yumi bai lukim olsem mak bilong propeti i save stap namel long fiks intres o bon na ol sea o ikwiti olsem Piksa 1 i soim daunbilo. Tasol long hap we wanpela propeti stret i stap aninit long mak em i save bihainim wanem kain stail properti ol i toktok long en, na wanem hap dispela invesmen i stap insait long kepitel straksa. Em olsem sapos dispela invesmen em i ikwiti o wanpela dinaw we ol i tok orait long en.



Piksa 1, i kam long NSL

Insait long invesmen potfolio bilong NSL, ol propeti i save kamapim liklik hap tasol bilong olgeta mani mak bilong invesmen potfolio, em long ol hap we ol propeti i stap long komesel residensel, indastriel na long ol hap graun.

Wankain long ol narapela invesment, ol propeti i gat tupela bikpela kain mani save kam insait. Namba wan, em i gat mani save kam insait olgeta taim, long rent bilong ol propeti. Namba tu, em ol independen veliua i save givim ol veliuesen veriesen. Long pinis bilong wan wan yia NSL i save putim namba wan kain mani antap long namba tu, em bilong kamap wantaim wanpela ges mak bilong hamas kos bilong propeti.

Mani mak bilong propeti i save go wantaim ol narapela mani we i save kam long ol invesmen olsem ikwiti na ol bon, long kisim olgeta mani kam insait long NSL potfolio bilong wanpela yia.

NSL i save putim mani long ol propeti long namel taim i go long longpela taim, olsem na em i save gat dua i op long hevi ken kamap olsem ol dispela i stap long lista daunbilo:

- 1 Likwiditi – dispela hevi i luksave olsem, long maket sais bilong PNG we i no gat bikpela maket bilong mani i stap, ol propeti bai i no inap long kamapim kes mani hariap,
- 2 Ikonmik – dispela hevi i luksave olsem, sapos ikonmi i bungim wanpela risesen o taim bilong mani sot, orait hevi bilong ol lain bilong rentim haus i no baim rent mani long taim bai go antap, na tu bai no gat planti lain i laik long rentim ol haus,
- 3 Maket – dispela hevi i luksave olsem wok bilong maket i go i kam i stap, long ol senis i save kamap long ol man i laikim propeti na long wanem kain propeti i stap long givim bilong rent,
- 4 Intres reit – dispela hevi i luksave olsem taim intres reit i go antap em inap mekim ol kos bilong propeti tu i go antap, na bai senisim ol kos bilong propeti na em bai mekim bikpela senis long ol veliuesen bilong ol propeti,
- 5 Inflesen – Dispela hevi i luksave olsem ol mani we i kam long ol propeti ino inap long resis wantaim mak bilong inflesen, maski sapos planti rent agrimen i go wantaim mak bilong inflesen.

Taim NSL i kamapim mani long karim ol dispela hevi, NSL i putim ol propeti i go insait long daivesifaid potfolio, long em i ken stopim ol dispela hevi long kamap, na long wankain taim em i wok long bihainim ol strongpela propeti polisi na gaidlain. Bai yumi tok olsem NSL em i luksave na em i was gut stret long hevi bilong propeti na tu long wanem kain rot bilong stopim o long daunim dispela hevi no ken bagarapim maket bilong ol propeti na long mani kam insait.



Long kamap Nambawan pren bilong yu na famili; halivim, strongim na lukautim moni gaden bilong yu nau na bihain.

BIKPELA, GUTPELA, SEIF, STRONGPELA NA I STAP NAMBA WAN YET.

Klaimet senis senta i skulim ol sumatin

NUPELA Klaimet Senis Senta bilong Wail laip Konsevesen Sosaiti (WCS) long Kavieng opim dua bilong en long kisim namba wan ekseesen grup t long dispela mun Ogas

Wanpela gret seven klas i gat 29 sumatin bilong Kaselok Praimeri skul i bin namba wan grup long go lukluk raun long senta tupela wik i go pinis.

WCS Komyuniti Engesmen Opisa, Francis Gove i tok olsem lukluk raun bilong dispela klas grup em i namba wan taim long planti sumatin i go long senta long wanpela taim. I gat ol narapela taim we wan, wan sumatin i save go lukluk raun long senta stat

long taim ol i bin opim senta long mun Epril long dispela yia.

"Ol sumatin i kam long senta bipo tasol ol i kam olsem wan, wan long ritim ol buk o kisim buk long wokim risets bilong ol long envoironmen," Gove i tok.

Senta i gat ol tok save bilong bikpela envoironmen na konsevesen we em i toktok long Nu Ailan kain ol samting olsem long sastenebel wei bilong yusim ol samting bilong solwara, bus na diwai na ol wei bilong holim strong ol mangro.

Ol tok save i stap bilong olgeta lain long liklik i go bikpela wantaim ol posta, buk, pamflet na ol video

bilong klaimet senis, tasol senta i laikim ol skul sumatin na ol grup long provins.

Ol sumatin bilong dispela klas i amamas long yusim senta long wokim asainmen bilong ol i toktok long rot bilong kaikai na wei bilong ol man i save go wantaim rot bilong kaikai i save kamap na pinis long maus bilong ol man.

Gove i tok senta i laik lukim planti moa skul i kam insait long wanpela program we ol i wok long kamapim bilong ol kain grup olsem long wokim ekseesen na ekseesais.

Ol sumatin tu i tok ol bai lainim planti samting long dispela kain lukluk raun.



Ol Kaselok Praimeri skul sumatin i bin namba wan grup long go lukluk raun long nupela Klaimet Senis senta.

K548 milien long Hela na NCD rot



K500 MILIEN NCD ROT SAINING: Gavana Jenerel na Gren Sif Sir Michael Ogio, i sainim kontrak long ol NCD rot we Spots na Nesenel Ivens Minista na Mosbi Saut MP, Justin Tkatchenko, NCD Gavana, Powes Parkop na ol bikman bilong BSP i bin witnessim. *Poto: Gavana Jenerel Midia*

ROT i bikpela samting long kisim na givim sevis i go long olgeta hap bilong kantri na tu, long kamapim ol wok developmen.

Maski rot i stap long taun na ol rurel eria, em i bikpela samting bikos pipel bai kisim helpim long ol sevis na tu, long kisim ol samting i go long ol maket, bris nap les balus.

Long dispela wik, Gavman i bin sainim tupela kontrak long wokim ol rot long Sauten Hailans provns na Nesenel Kapitel Distrik long bikpela ma-

nimak i winim K548 milien.

Gavana Jenerel na Gren Sif, Sir Michael Ogio, i bin makim gavman long sainim kontrak agriemen long las wik Fonde wantaim wanpela lokal kontrakta, Ipwenz Construction Ltd, long wokim Hiri Lai Rot long Hela long Sauten Hailans. Manimak bilong wokim dispela 36 kilomita rot i klostu long K48.5 milien.

Long wankain taim tu, Sir Michael i bin makim Stet na sainim agrimen inap long

samting olsem K500 milien manimak long wokim ol nesenel rot projek insait long Mosbi siti.

Long ol rot insait long Mosbi siti, em bai kostim moa long K500 milien na Benk Saut Pasifik (BSP) i patna wantaim Nesenel Kapitel Distrik long dispela projek we Stet bai fanim.

Spots na Spots na Nesenel Ivens Minista na Mosbi Saut MP, Justin Tkatchenko, NCD Gavana, Powes Parkop na ol bikman bilong BSP i bin witnessim saining seremoni.

Hela i wetim yet LNG mani

Aja Potabe i raitim

GREN Sif Sir Michael Somare i tok ol papagraun bilong PNG LNG Projek i mas kisim royalti na ikwiti mani bilong ol.

Sir Michael husat i bin stap praim minista na long taim bilong kamapim dispela LNG projek i tok gavman i mas givim luksave long ol papagraun long Hela na stretim hariap dispela mani bilong ol.

"Mi amamas tru long PNG LNG Projek. Dispela bikpela ges projek i kamap long kantri bilong yumi taim mi bin

stap praim minista.

"Mi laik tok tenkyu long ExxonMobil long bilip strong long dispela kantri olsem wanpela gutpela kantri long inves na mekim bisnis.

"Mi laik tok tenkyu long ol lida bilong Hela na Sauten Hailans long sapotim gavman long kirapim dispela bikpela ges projek.

"Wok bilong gavman nau em long stretim hariap ol papagraun long Hela na larim ol i kisim benefit long dispela ges projek.

"Mi no wanbel long gav-

man i no stretim ol papagraun hariap. Gavman i mas givim mani bilong ol papagraun long Hela," Sir Michael i tok.

Gren Sif i tok em i amamas tu long ol arapela biknem kampaini olsem Total SA bilong Frens i kam insait pinis long kantri.

Total bai kamap patna wantaim InterOil long kirapim namba tu LNG projek long Galp provins. Nem bilong dispela projek em i Papua LNG Projek.

Gavman i tok mani bilong papagraun i stap seif long wanpela tras akaun wantaim Sentral Benk (Benk ov PNG).

PNG lukluk long LNG maket long India

PAPUA Niugini i lukluk long wok klostu wantaim India long maket bilong salim PNG LNG ges na ol developmen bilong daunstrim prosesing long ol petro-kemikel produk.

Praim Minista Peter O'Neill i tokaut long dispela bihain long em i bung wantaim ol eksekutiv bilong Oil na Ges kampani bilong gavman bilong India (ONGC) Grup Limited, Petronet LNG Ltd na GAIL Limited long dispela wik long Delhi, India.

Praim Minista Peter O'Neill wantaim delegesen bilong em na ol bisnis manmeri long PNG i stap nau long India long painim rot bilong wok bisnis na strongim bisnis namel long India na PNG

"India i gat bikpela maket we i nidim moa eneji long wok," Mista O'Neill i tok.

"PNG em i stap klostu long India, LNG bilong yumi em hai kwaliti na maket long India i redi long baim LNG bilong yumi.

"LNG nau em i stap long 9 pesen bilong eneji maket long Papua Niugini na taim yumi lukim PNG na ol arapela kantri bilong LNG, ol i gat 24 pesen."

Mista O'Neill i tok India i lukluk long yusim LNG long mekim bisnis, na tu long envoironmen sevis olsem klinpela fiul.

"Nau Papua LNG projek i kamap, i gat maket i wetim LNG bilong yumi.

"Wanpela MoU we Petromin PNG Holdings Limited i sainim wantaim ONGC na Petronet LNG Limited bilong India, i putiim PNG long gutpela rot long toktok moa long ol bisnis bilong LNG namel long tupela kantri."

Mista O'Neill i tok India i gat gutpela eksperiens long prodaksen bilong petro-kemikel na i gat bikpela sans long PNG i wok wantaim long kisim ol gutpela sevis.

Em i tok India i gat ol bikpela teknologi bilong daun-

strim prosesing bilong ol petro-kemikel produk na PNG olsem nupela long bisnis bilong LNG, na tupela kantri i ken mekim gutpela bisnis long ol pipel bai kisim sevis long ol winmani na ol arapela sevis.

"Wok bung namel long PNG na India long eneji na risos kampani bai go het long ol mun i kam long lukim gutpela kaikai i kamap," Mista O'Neill i tok.

"Mipela i lukluk long kamapim moa toktok long skruim yet ol toktok nau na kamapim ol gutpela agrimen na kamapim moa wok inap long ikonomi bilong tupela kantri."

Long dispela raun bilong Praim Minista Peter O'Neill i go long India, em i toktok tu wantaim ol delegesen bilong Angeliq Intanesenel Limited long painim rot bilong developim infrastraksa bilong pawa saplai long Pasifik na PNG.

KPPA i sainim MOU wantaim developa

KONEBADA Petroleum Pak Atoriti (KPPA) i sainim Memorandum ov Andastending (MOU) wantaim wanpela kampani bilong Saina gavman long developim Pak long las wik Fraide.

Dispela MOU bai i mekim isi long Saina CAMC Engineering Kampani Limited stadi, plen na disain long developim strong bilong dispela projek.

Dispela ol projek bai mekim ensinia wok, prokumen na konstraksen bilong riniuebel eneji sos long yusim ol windmil o sola wantaim strong bilong jeneresen olsem 15-20 megawats.

Ol narapela projek long dis-

pela stadi bai i rot kontraksen na ol yutiliti infrastraksa olsem wara, surij, telekomyunikesen na ilektrisiti transmisen long yusim rivais plen bilong Petroleum Pak.

KPPA opis bilding bai stap insait long dispela, weist tritmen na stretim doti wara kamap klin long yusim long ol egrikalsa wok long helpim ol papa graun.

Siaman bilong nupela KPPA Bot, Raho Kevau, i tok saining bilong MOU i luk olsem liklik samting tasol em i bikpela samting long KPPA long developim gen ol petro-kemikel wok na ol ol lain save yusim ol indastri.

Mista Kevau i tok dispela seremoni i makim stat bilong KPPA olsem wanpela atoriti long statim wok na karim aut developmen bilong Konebada Petroleum Pak.

Em i tokim ol bikman bilong Saina olsem KPPA i amamas long kamapim dispela marit namel long gavman bilong Sainis long CAMCE na PNG long KPPA.

Long wankain taim, Asisten Presiden bilong CAMCE, Liu Shengcheng, i tok kampani bilong em bai traim long mekim gut long givim fainensel na teknologi helpim tu.

CAMCE bai pinis long stadi insait long 12-pela mun



Nesenel ERT Salens Bai Kamap long Madang

PABLIK manmeri long Madang taun na ol sumatin long ol skul insait long provins stat long dispela wiken bai i gat sans long lukim ol imejensi rispons tim i kam long ol bikpela risos projek long PNG i resis insait long namba 5 Nesenel Imejensi Rispons Salens.

Dispela 2015 Nesenel ER Salens bai stat long Sarere, Ogas 22 na pinis long Tunde Ogas 25 na Ramu NiCo Menesmen (MCC) Limited i go pas long redim salens we bai kamap long graun bilong tupela bikpela skul em Divine Word University na PNG Maritime Koles.

Ramu NiCo (MCC) namba wan nikel/kobalt projek developa long PNG i amamas long redim ol program bilong 2015 Nesenel ER Salens, we bai lukim ol tim i kam olsem long Lihir, Morobe Maining, Oil Search, Porgera, Simberi na Ramu NiCo long resis.

Lihir bai salim tupela tim na ol arapela bai salim wanpela tim long dispela 2015 Nesenel ER Salens long Madang. Ramu NiCo bai gat tupelo tim.

Dispela salens bai lukim ol imejensi rispons tim bilong ol maining na petroleum kampani blong PNG i soim sampela kain stail na wei bilong ol long daunim o abrusim birua long taim

nogut.

Ol dispela salens bai lukim ol i soim stail bilong kilim indai paia, givim marasin na helpim man i kisim bagarap, rot long yusim masin long kisim win taim hevi i kamap, helpim man pundaun antap tru wantaim helpim blong rop na tu ol tes long save long sait long rit na rait.

Bikpela as-tingting bilong dispela salens em long ol ERT lain bilong PNG i serim ekspiriens bilong ol na tu lukluk moa long lainim nupela ol rot long sait blong abrusim birua na helpim wanpela arapela long taim bikpela birua i kamap long ol risos projek long kantri.

2015 Ivents Kodineta na ERT kodineta long Ramu NiCo KBK Main, Daniel Round i tok dispela salens long Madang bai go gut stret bikos ol lain ogenaisa i redim ol ples gut stret.

"Mipela amamas tru long soim ol fasiliti na ol samting long Madang taun long ol lain ER tim i kam long ol arapela main insait long PNG," Mista Round i tok.

Em i tokaut olsem ol i stat plenim dispela ER salens long las yia yet na bikpela tingting bilong Ramu NiCo em long lukim olsem salens long Madang i kamap gut stret na winim ol arapela salens we i kamap pastaim.

Long las yia Nesenel ER Salens i bin kamap



Bena bilong ER Salens long Madang ples balus.

ER tim i soim sampela wei bilong pasim rop na helvim man or abrusim birua.



ER tim bilong Ramu NiCo soim pasin bilong helvim man taim em i kisim bagarap.

long Kavieng we Newcrest Maining i go pas long redim.

Namba wan ER salens i bin kamap long Lae long 2011. Ol lain ogenaisa bilong 2015 Nesenel ER Salens i tok amamas long ol spona olsem Falck, Scott Safety, Fire Rescue Safety Australia, IPI, Drager, Chubb Fire and Security, Protector Al-safe, Dunlop PNG, Red Earth, Newcastle Rescue, Icom PNG na PWR Australia.



Ramu NiCo Management (MCC) Ltd,
 the manager of Ramu NiCo Project is proud to host the 5th
NATIONAL MINING EMERGENCY RESPONSE CHALLENGE
 in Madang
 Date: August 22-25, 2015
 Venue: DWU & PNG Maritime College



Waerea- Hargreaves bai no inap pilai

STRONGPELA fowod bi-
long ol Sydney Roosters,
Jared Waerea- Hargreaves,
bai no inap pilai gen long
ol pilai i stap yet.

Waerer- Hargreaves i bin
kisim bikipela bagarap long
skru bilong em long taim pilai
i kamap namel long ol Roost-
ers na Brisbane Broncos long
las wik Sarere nait we Roost-
ers i bin winim dispela pilai.

Wanpela mausman bilong
ol bek-roa, Aidan Guerra, i
tok, "Mipela i gat bikipela
spes nau long pulmapim ples
bilong prop bilong yumi."

"Waerea- Hargreaves i
save soim kala bilong em
long taim bilong pilai na em i
kala bilong tim, tasol taim em
i kisim bagarap, tim i gat pawa
long mekim disisen long ples
bilong em," Guerra i tok.

Ol i ting olsem Sam Moa
bai kisim ples bilong Waerea-
Hargreaves long raun 25 pilai
bai kamap long Fraide namel
long Roosters na Manly.

Tasol, Mitchell Pearce bai
no inap pilai insait long wan-
pela mun bikos em i bin
kisim bikipela bagarap tu,



long wankain taim.

Jackson Hastings bai kisim
ples bilong Pearce long hap-
bek olsem em i bin pilai taim
ol i pilai egensim Brisbane.

"Olgeta tim i save kisim
bagarap olsem mipela i kisim.
Em i no namba wan taim we
mipela i kisim bagarap na bai
yumi singaut na kraai, nogat,"
Guerra i tok.

"Mipela i lusim wanpela pi-

laia, tasol mipela bai win yet."

Long narapela sait, kapten
bilong South Sydney Rab-
bitohs, Greg Inglis, i bin go
long haus sik long katim skru
bilong em long Mande, tasol
em bai go bek yet long fainal
singaut bilong ol.

Inglish i kisim bagarap
long skru bilong em taim ol
Rabbitohs i pilai egensim ol
Canterbury long las wik we

Rabbitohs i lus.

Taim ol i sekim long masin
bilong haus sik, ripot i soim
olsem skru bilong em i
bagarap na em bai gat liklik
operesen.

Em bai no inap long pilai
long dispela wiken wantaim
ol Broncos long Fonde (tude),
tasol em bai pilai wantaim ol
Sydney Roosters long fainal
pilai.

Ol Poto na stori: ABC

Sea Eagles i no pilim gut

KOSA bilong Manly Sea
Eagles, Geoff Toovy, i no
pilim gut taim ol Parramatta
Eels i daunim ol 20-16 long
raun namba 25 long Nesanel
Ragbi Lig (NRL).

Dispela lus bilong Manly i
stopim ol long go long fainal
pilai bilong ol.

Manly i ken go insait long
top-8, sapos em i winim tu-
pela raun, 26 na 27, wantaim
24 poin, tasol Eels i rausim ol
long raun 25 long Brookvale
pilai graun.

"Mi ting olsem mipela i stap
long gutpela ples na sapos
mipela i winim las tripela pilai,
mipela i ken kamap gut stret,
tasol nau mipela bai strong
liklik," Toovy i tok.

"Manly i no redi long lus,



tasol pilai bilong mipela i no
kamap stret olsem mipela i
laikim."

Eagles bai pilai wantaim ol
Roosters husat i go pas long
resis, tasol Eels bai painim
hat taim bikos huka bilong ol,
Matt Ballin, i bin kisim
bagarap long skru bilong em.

Pilai bilong Ballin i stop
taim wanpela aua na 30
minit i stap yet, tasol ol i stap
long asples bilong ol na i
daunim ol Manly.

Wanpela bikipela samting
bilong ol Manly em, senta bi-
long ol, Steve Matai, i putim
ol skoa long kamap namba 4
Manly pilaia wantaim 50 trai
na bihain Steve Menzise
(88), Brett Stewart (86) na
Bob Fulton (70).



Jennings i kisim sas

NESENEL Ragbi Lig (NRL)
pilai rivi komiti i givim sas
long pilaia bilong ol Sydney
Roosters, Michael Jennings,
long em i bin mekim wanpela
hai takol long Darius Boyd
long las wik Sarere pilai
egensim Brisbane.

Em bai no inap pilai long
dispela wik, na wankain
penalti em bai kisim, sapos
em i lus long kot long dispela
gret-1 hai takol.

Ol top pilaia bilong Roost-
ers olsem Jared Waerea-
Hargreaves i bin kisim
bagarap long skru, Mitchell
Pearce i kisim bagarap tu,
taim ol i pilai wantaim ol Ea-

gles na nau Jennings bai
malolo.

Joseph Leilua, husat i pi-
laia bilong Canberra bai ma-
olo tu long tupela pilai
wantaim, long em i bin givim
strongpela solda sas long
Gold Coast pilaia David
Mead.

Ryan James bilong Titans
bai no inap pilai tu, bihain
long em i bin kisim strong-
pela takol long Sam Williams
bilong Illawarra.

Long wankain pilai, be-
k-roa bilong St George, Jake-
Marketo, bai no inap pilai
bikos em i bin tromoi wan-
pela strongpela takol tu.

NRL premiasip resis i senis



NESENEL Ragbi Lig (NRL)
resis i senis taim tupela
namba wan pilaia bilong
Roosters na Cowboys i bin
kisim bikipela bagarap.

Roosters i lusim prop bi-
long em, Jared Waerea- Har-
greaves, i bin kisim bikipela
bagarap long skru bilong em
taim ol i pilai wantaim ol Bris-
bane long las wik Sarere
nait.

Hapbek bilong Roosters,
Mitchell Pearce, tu i kisim
bagarap long wankain pilai na
em bai no inap pilai long tu-
pela raun i stap yet, tasol em
bai kam bek long fainal pilai.

North Queensland Cow-
boys i gat wankain havi
olsem ol Roosters i gat.

Prop bilong ol, James
Tamou, bai no inap long pilai
gen long las tupela raun na
long ol fainal tu, bikos em i
bin kisim bikipela bagarap
long nek bilong em.

Dispela pilai i bin kamap
long las wik Sarere we ol
Cowboys i winim ol Warriors
long asples bilong ol long
Auckland pilai graun.

Pleimeka bilong ol, Michael
Morgan, tu bai kisim malalo
long dispela yia pilai bikos
em i tanim enkel bilong em
long Mt Smart pilai graun.

Peter Sterling, husat i pi-
laia bilong Parramatta i bilip
olsem premiasip bilong ol
Cowboys bai stop, sapos
Mogan i no kam bek long pi-
laia graun long dispela sisen.

"Long tingting bilong mi yet,
Cowboys bai no inap long
winim dispela resis, sapos
Mogan i no kam bek gen,"
Sterling i tok aut long Sande
Futi So bilong Sanol 9.

Kapten bilong Saut Sydney
Rabbitohs, Greg Inglis, i bin
kisim bagarap, tasol Issac
Luke na Luke Keary bai joinim
ol Sydney gen.

Warriors bai no inap kwalifai
long fainal, tasol prop bilong
ol, Jacob Lillyman, i bin kisim
bagarap long raun 24 na em
bai no inap pilai long dispela
sisen.

Roosters, Broncos na Cow-
boys long 36 poin long lata
bilong NRL taim Tricolours i
stap antap long ol.

Inggris bai gat operesen long skru

KEPTEN bilong South
Sydney Rabbitohs bai go
long skru operesen na
Rabbitohs i wari long pre-
miasip pilai bilong ol taim
supa na stail pilaia bilong
ol, Greg Inglis, i kisim
bagarap long skru bilong
em.

Inggris bai no inap pilai
long Fonde (tude) na bai
no inap long kam bek
long fainal bikos skru bi-
long em bai no inap drai
kwik taim.

Taim Rabbitohs i win
32-18 na daunim Canter-
bury long las wik, ol i bin
kisim Inglis i go long haus
sik long sekim skru bi-
long em na ol i painim aut
sampela liklik bun o
katilej i stap antap long

skru bilong em i bagarap.

Faiv-eit bilong ol
South, Luke Keary, i tok,
"Inggris em i kepten bilong
mipela na em i kisim
bagarap i makim olsem
mipela i mekim bikipela
lus."

"Em i save go pas long
mipela long olgeta pilaia
na i save pilai gut we ol-
geta lain i save long dis-
pela," Keary i tok.

"Bihain long South i
winim ol North Queens-
land long Townsville long
tupela wik i go pinis, ol
Buldog i slekim ol long
Fraide bikos ol i senisim
ol pilaia planti taim."

"Tasol, nau mipela i
traim long mekim gut
long dispela wik."



Wina bilong PNGDC na FVC bai pilai

WINA bilong Papua Niugini Digicel Kap (PNGDC) resis na Fiji Vodafone Kap (FVC) resis bai pilai long Pot Mosbi long Oktoba bilong kamap wina long Ragbi Lig Melanesien Klap Sempionsip.

Oi i bihainim lekmak bilong wol kap salens, Nesenel Ragbi Lig (NRL) na Supa Lig Klap, premiasip bilong PNG na nesenel lig bilong Fiji na bai pilai long winim nem bilong riji.

Dispela pilai bai kamap long Sir John Guise pila graun long Pot Mosbi long Sarere 10 Oktoba, 2015 long 7 kilok apinun.

Sikspela klap i stap yet long winim resis bilong Digicel Kap bilong PNG em Lae Snax Tigers, TNA Simbu Lions, Hela Wigmen,

Agmark Rabaul Gurias, Mendi Muruks na Mount Hagen Eagles.

Eitpela tim i pait yet long winim Vodafone Kap bilong Fiji em Fair Trade Makoi Bulldogs, Saru Dragons, Nadera Panthers, Sabeto Roosters, Nabua Broncos, Nadi Eels, Kinoya Sea Eagles na Burenitu Cowboys.

Gren Fainel bilong Digicel Kap bai kamap long Sarere, 5 Septemba na long Sarere, 19 Septemba, Vodafone Kap Gren Fainel bai kamap.

Tupela wina bai pilai long Melanesien Kap sempionsip.

Dispela em i yia ragbi lig pilai bai kamap long riji na apim na strongim wan wan nesenel resis bilong yumi, na givim ol lokal tim moa strong long resis moa," Siaman bilong Papua Niugini Ragbi

Futbal Lig (PNGRFL), Sandis Tsaka i tok.

Tsaka i tok tenkyu long Fiji Nesenel Ragbi Lig (FNRL), Ragbi Lig Intanesenel Federeesen (RLIF), PNGDC, FVC, ol sponsa bilong PNGDC na FVC na PNG Spot Faundesen long sapotim dispela tingting.

Siaman bilong PNGDC, Sudhir Guru, i tok, "Mi amamas na tok tenkyu long PNGRFL i kamapim dispela tingting long mekim Melanesien Klap Sempionsip bikos em bai strongim Digicel Kap program."

"Dispela tingting bai strongim ol pilaia long olgeta tim long pilai gut long winim namba wan ples insait long kantri na wol," Guru i tok.

Het meri bilong maketing sait long Digicel, Eva Janda,

i tok, "Mi gat bikpepla amamas na tok tenkyu long Mista Tsaka long kamapim dispela tingting bikos em bai strong ol pilaia bilong PNG na Fiji wantaim na tu, long strongim wok pren namel long ol Melanesien kantri."

"Mipela i gat bikpela amamas taim mipela i lukim long kalenda olsem dispela pilai bai kamap," Siaman bilong FNRL, Mista Filimoni Vosarogo, i tok.

Em i tok moa olsem, "Dispela em i amamas taim bilong Melanesien patnasip o marit bilong yumi."

"FNRL i save lukluk olsem PNGRFL em i narapela hap bilong ragbi lig i save gro long Pasifik na nau mipela i stap long salensim dispela resis, na mipela i laikim wankain resis i ken kamap long ol yia long kam," Vosarogo i tok.

Etletik: Yao na Koniel i kwalifai

SAPOLA Yao na Donna Koniel i bin kwalifai long etletik long Osenia Eria Sempionsip long Kens, Australia na nau tupela i stap long Beijing, Saina na pilai long IAAF Wol Sempionsip.

Yao i resis long 3000m steeplechase long las wik Sarere na i bin pinisim insait long 9 minit na 51.09 seken, na Koniel i bin resis long 800m heats long aste (trinde) moning.

Rijonal sempionsip long etletik ba kamap long namba tri tem holide bilong ol praimer na sekonderi skul.

Ol bai pilai insait long tripela de, na namba wan sempionsip pilai bai kamap long Sauten riji we ol bai pilai long Pot Mosbi long 18 Septemba i go inap long 20 Septemba.

Niugini Ailan rijonal sempionsip bai kamap long Septemba 21 i go inap long Septemba 23 we ol bai pilai long Keviang, Nu Ailan.

Hailans na Momase rijonal sempionsip bai kamap long Nesenel Spot Institut long Goroka, EHP long Septemba 24 i go inap long 26.

Ol bai mekim 4-pela divisen olsem anda 14, anda 16, anda 18 na open.

Bikpela namba bai pilai long dispela etletik pilai bikos planti yangpela i bin lukim planti pilaia i bin pilai gut na kamapim nem bilong PNG long 2015 Pasifik Gem.

Ol pipel husat i go pas long dispela gem i tok long putim olgeta infomesen bilong kompetisen long Etletik PNG Websait.

PNGNRL i skruim pilai

PAPUA Niugini Nesenel Ragbi Lig (PNG) i skruim pilai namel long Lae Sneks Tigers na Mendi Muruks na ol i pilai long Mande.

Ol i skruim dispela pilai bikos bikpela rein i bin pundaun long Lae long Sande na karamapim Lae Ragbi Lig pilai graun.

Siaman bilong Muruks, Issac Joseph, i tok, "Ol i ken skruim dispela pilai i go long Mande bikos pilai graun i no stap orait long ol bai pilai."

"Bikpela rein i bin pundaun long Sande Moning na i kamapim ol raun wara long olgeta hap bilong pilaia na ol i lukim olsem planti pilaia long tupela sait wantaim i ken kisim bagarap. Dispela em i as tingting we ol i bin stopim pilai long Sande," wanpela opisa bilong Tigers i ripot.

Planti pipel husat i sapota bilong tupela sait wantaim i bin kisim bel hevi na i laik kamapim birua pasin taim ol i bin stopim gem long Mande bikos ol i bin yusim planti mani long lukim dispela pilai.

Ol belat manmeri na pikinini i singaut antap long ol opisa na sekyuriti long bekim ol tiket mani bilong ol long dispela taim.

Namba bilong ol polis i liklik tumas na ol i hat tru long kontrolim, tasol ol i no kirapim wanpela bikpela pait bikos ol tim opisa bilong Lae Ragbi Lig (LRL) i kwilim belat bilong ol sapota we ol i tok orait long ol i ken yusim dispela tiket long lukim gem long Mande.

Seketeri bilong LRL, Martin Surap i tok, "LRL i nogat pawaw long mekim disisen bikos PNGNRL ogenaizing komiti i mekim disisen pinis."



Ol Lae Snax Tiger pilaia i wokabout kam long pilai graun bihain long i pilai wantaim SNS Vipes long Pot Mosbi. Tigers i gat sans long pilai wantaim top tim bilong Fiji sapos ol i winim gren fainel bilong Digicel Kap. *Poto Nicky Bernard.*

Ol hap bilong pilai bai redi long mun Oktoba

OLGETA spoting fesiliti long Bisini, Taurama Akwatik Indo Senta, Sir John Guise Stadium na Indo Kompleks bai open long Oktoba 2015.

Ol i no bin mekim opisal opening bilong ol dispela fesiliti bikos ol kontrak kompani i no pinisim wok bilong ol yet.

Ol i hariap tru long yusim ol fesiliti long wanpela mun i go pinis bikos taim bilong 2015 Pasifik Gem i bin kamap klostu na ol kontrakta i no gat taim long pinisim ol wok.

Bihain long gem, ol i bin givim tupela mun long ol kontrakta long pinisim wok bilong ol, tasol ol kontrakta i kisim planti taim i mekim na planti spot kompetison i stap yet.

Sif opereting opisa bilong Nesenel Spot Tras Limited (NSTL), David Aua, i tok,

"Planti ol hap bilong pilai bai redi long Oktoba bilong pablik long yusim."

"Mipela bai kisim sampela ful taim wokman o meri na i trenim ol gut long lukautim ol hap bilong pilai," Aua i tok.

"Aua i tok moa olsem, "Mipela i bin mekim plen pinis bipo long gem na nau mipela i stat long karim aut dispela plen."

"Mipela i bin mekim arensmen pinis long ol pilai olsem ragbi, kriket na soka bai kamap long ol dispela hap bilong pilai na i laikim ol narapela gem i ken kamap tu," Aua i tok.

NUPELA STAIL:

Sir John Guise Stadium bai redi long kisim ol pilai long Oktoba.

Poto Nicky Bernard



Gavman i bin givim K200, 000 long PNGRFU

Philemon Tame i raitim

Gavman bilong Papua Niugini i stap long baksait long sapotim ol pilai i ken kamap long PNG.

Long gem opim Osenia Ragbi Kap (OSC) i bin kamap long las wik Sarere long Sir Hubert Murray pilai graun long Pot Mosbi, nesenel gavman i bin givim K200, 000 long Papua Niugini Ragbi Futbol Yunion (PNGRFU) long ranim OSC pilai i kamap long Mosbi. Minista bilong Spot, Justin Tkatchenko, i tok, "Dispela mani em bilong helpim PNGRFU long yusim na baim ol hap bilong slip na ol narapela samting we em bai sot long baim."

Gavman i laikim dispela pilai i mas kamap gut na namba wan tru.

"Ragbi yunion em i pilai i gat planti sans we ol pilaia husat i pilai gut i ken win na

go pilai long ol narapela kantri tu," Minista Tkatchenko i tok.

Tkatchenko i tok, gavman i laikim ol man bilong narapela kantri i ken stap, kaikai na pilai gut na i ken go bek long kantri bilong ol olsem ol i laikim.

"OI televisen stesin bai soim dispela pilai bilong promotim ragbi yunion insait long pasifik na olgeta hap long wol," Spot Minista i tok.

"Long soim kantri bilong yumi long olgeta pipel bilong wol, ol fesiliti bilong spot na mak we PNG i stap long en tu."

Minista i tok moa olsem PNGRFU i save painim taim long kisim mani tasol em bai ranim dispela gem gut tru inap long pinis bilong en.

"Gavman bai no inap long mekim spot long stop we mipela i sanap pinis long larim gem i go het, tasol i gat sampela toktok we ragbi yunion bai stretim," Minista i tok.

OI bai statim Futsal long mun i kam

FUTSAL resis i kam bek gen long dispela yia we ol bai satim dispela pilai long Septemba 5, 2015 long Pot Mosbi.

Dispela resis em ol i save pilai aninit long Don BOSCO Lig we ol bai mekim 4-pela grup o divisen olsem Anda 12, Anda 19, Miks na Open Man.

OI bai mekim 10-pela tim long wan wan divisen we ol bai pilai long Don BOSCO Teknikel Institut (DBTI) long Mosbi.

Dispela gem em i nupela long Papua Niugini na i gat wanpela kos we ol kosa bai givim long DBTI we ol bai stat long Ogas 31 i go inap long Septemba 4, long ol pipel i ken save gut long dispela gem.

Spot Kodineta bilong DBTI, Francis Banania, i tok, "Dispela kos em i bilong skulim

na kamapim ol bihain kosa bilong futsal gem long kantri na mipela bai givim ol nupela infomesen long ol lo bilong gem, nupela teknik na rot bilong gem."

"Nau dispela gem bai kamap long Mosbi, tasol taim em bai kamap bikpela na planti pipel bai luksave long dispela gem, ol bai skruim i go moa yet long ol narapela provins insait long kantri na planti lain bai pilai," Banania i tok.

"Futsal i gat bikpela wok long kamapim futbol pilaia bikos em i gat kwaliti, spid na skil bilong em yet."

Em i tok moa olsem, "I gutpela long mekim patnasip wantaim PNG Futbol Asosiesen (PNGFA) long kamapim dispela gem long ol yangpela bai kisim skul long en na bai pilai bilong kisim sapot long bihain."

Hunters i stap long gren fainel resis



Hunters pilaia i amamas bihain long ol i bin pilai wantaim ol Cutters bikos ol i stap long namba 2 ples long lata. Win, lus o dro, Hunters i stap long Gren Fainel resis.

PNG HUNTERS i go pas yet long ol narapela tim bihain long ol i bin pilai wantaim ol Mackay Cutters long asples bilong ol Cutters long Mackay, Australia we skoa i bin sanap 28-28.

Hunters i stap pas long taim ol i pilai, tasol Cutters i bin sanap antap long asples bilong ol na i kisim moa strong long kisim wankain skoa olsem Hunters i kisim.

Media Menesa bilong Hunters, Martin Liri, i tok, "Mipela i bin kam long longpela rot, tasol ol pilai i mekim na mipela i bin kisim wankain skoa wantaim ol Cutters."

Hunters nau i stap long namba tu

ples long lata we ol bai pilai wantaim ol Burleigh Bears long dispela wik Sande long Sir John Guise pilai graun long Pot Mosbi na em bai las raun bilong ol long pilai long asples.

OI Hunters bai go het long fainel sapos ol i win, lus o dro.

Long wik namba wan bilong eliminesen fainel, tim husat i stap namba 3 ples bai pilai wantaim tim i stap namba 6 ples na tim i stap namba 4 ples bai pilai wantaim tim i stap namba 5 ples.

Long wik namba tu bilong ol fainel, Hunters bai pilai wantaim ol Black-

hawks bikos tupela i stap long namba wan na namba tu ples long lata. Wina bai sten-bai long gren fainel bai kamap long Sande Septemba 27, long Sun-corp Stadium long Brisben, Australia.

Long wankain wiken long wik namba tu bilong fainel, wina bilong namba 3 ples Vs namba 6 ples bai pilai wantaim wina bilong namba 4 ples Vs namba 5 ples na lusa bai go aut long ol fainel.

Long wik namba 3 bilong fainel, wina bilong gem namba 4 bai pilai wantaim lusa bilong Blackhawks Vs Hunters na long wik namba 4, ol bai pila gren fainel.

BSP i givim K20, 000 long PNGBSA

BENK Saut Pasifik (BSP) i sapotim PNG Billiard na Snuka Asosiesen (PNGBSA) na i bin givim K20, 000 sek long spon-sasip bilong nesenel snuka taitel. Dispela snuka taitel bai kamap long neks mun.

BSP i sapotim snuka sempionsip insait long 12-pela yia pinis na dispela em i 13 yia bilong em.

Kopret Spon-sasip Menesa bilong BSP, Rosemary Mawe, i tok, "BSP i bin lukim pinis olsem snuka i gro bikpela long kantri, insait long patnasip wantaim PNGBSA na BSP bai go het long givim sapot."

Namba tu presiden bilong PNGBSA, John Chan, i tok tenkyu na tok em i amamas long sapot bilong BSP.

"Pilai bilong dispela yia bai kamap namba wan tru we em bai kamap long wankain taim wantaim 40 yia Independens selebresen," Chan i tok.

Snuka taitel pilai bai stat long Pot Mosbi long Septemba 10, wantaim Maina o B Gret sempionsip na Mesa o A Gret sempionsip bai stat long Septemba 16.

OI Wigmen i stap laip yet



Wanpela pilaia bilong Lae Snax Tigers i ran strong long brukim banis bilong birua tim. Tigers i strong tumas na daunim Mendi Muruk 11-10 long Mandé, na em i redi long go long fainal long Digicel Kap resis.

Travel to Kiungu
Visit friends and family.
When were you home last?



Very Low Air fares

Linking our country

Reservations - Toll Free: 1805465 Email: sales.linkpng@airniugini.com.pg

Find us on Facebook: www.facebook.com/linkpng





Tim Pukpuk i redi long kisim American Samoa.



Bikpela fowad bilong Pukpuk i traim banis bilong Samoa long Oseania Ragbi Yunien salen long Mosbi.

Oi poto: Nicky Bernard



Top pilaia meri bilong Poi Nagu i redi long paitim bal long Midia Pul Kompetisen long Mosbi.




AON pilai i pasim bal i go long wan pilaia long Kopret tas long Mosbi.



Pilaia bilong Kelione i lukluk gut long wanem hap em bai paitim bai go long en long wiken pilai long Midai Pul.



Tim American Samoa i singim Nesenel Entem bilong ol.



IMPROVED TASTE! Niupela teist wantaim planti mit na oil. Teistim na bai yu laikim moa yet.

DIANA

Tuna



Emi tuna
bilong PNG

PROUDLY
PNG
MADE

Manufactured by



RD Tuna Canners Ltd.

Moa mit na
oil insait



TUNA IN OIL

Pukpuk i mekim liklik senis

PUKPUK YA: Namba 9 bilong Pukpuk, Genia, i traim long abrusim bikpela fowad bilong American Samoa long pilai bilong ol long Oseania Kap resis long Pot Mosbi.
Poto Nicky Bernard.



KOSA bilong Papua Niugini Pukpuk, Sydney Wesley, i tok em i bin mekim liklik senis long raun namba 2 long asde (Trinde) pilai egensim American Samoa long Sir Hubert Murray pilai graun.

Wesley i amamas long raun namba 1 pilai i bin kamap namel long PNG Pukpuk na Tahiti we PNG Pukpuk i win 32-10 long las wik Sarere.

"I no gat wanpela bikpela bagarap i bin kamap, tasol winga Wesley Vali i bin malolo long raun namba 2 bikos em i bin kisim liklik bagarap long raun namba 1 pilai," Wesley i tok.

Ol narapela pilaia i bin kisim liklik bagarap tu, tasol ol i pilim orait insait long 3-pela de na ol i pilai wantaim ol American Samoa asde.

"Ol boi bilong mi bin mekim liklik asua long raun namba 1 pilai na mi bin stretim pinis, na long asde pilai em ol wankain pilaia tasol i bin pilai," Wesley i tok.

"Mipela i winim raun namba wan pilai na raun namba tu em mipela i bin gat planti strong long winim."

Mitsubishi FUSO Rosa Bus



Apgred ensin
130Hp
4 silinda disel



PIKSA EM BILONG ILLUSTRASEN WOKTASOL

**Ikamap Wantaim
26 na 30 Sit**



Hariap nau na go long
Boroko Motors dila bilong yu



Port Moresby ph: 325 5255 | Lae ph: 472 1144 | Mt Hagen ph: 542 1933 | Tabubil PH: 649 9048
Kimbe PH: 983 5035 | Madang PH: 422 2658 | Kokopo PH: 982 8193 | Goroka PH: 532 3552

Email: info@borokomotors.com.pg
Website: www.borokomotors.com.pg



AMP133207-18